

宋史

卷二百七十二之七十七




CHINESE - JAPANESE LIBRARY OF
HARVARD - YENCHING INSTITUTE

AT HARVARD UNIVERSITY
JUL 30 1936

455

T 2455/21



Harvard College Library Imaging Services <http://imaging.harvard.edu>

CM 0	1	2	3	4	5	6	7	8	9	10	11	12	13	14	15	16	17
Lab D50 2	95/0/2	81/0/0	66/0/0	51/0/1	35/0/0	20/0/0	29/19/54	55/-39/33	40/9/-43	52/48/17	82/4/79	51/50/-13	50/-28/-29				
	38/14/16	66/16/18	50/-5/-22	43/-14/21	55/-9/-25	71/-32/0	62/34/60	40/9/-43	52/48/17	31/21/-21	72/-23/57	73/19/68					

列傳

第三十一

宋史二百

七冊文學漢和

開封儀同三司在國錄軍國軍事前中書右丞相監修國史領經筵事都總裁脫脫等奉

勅修

楊業

子延昭等
王貴附

荆罕儒

從孫嗣

曹光實

從子克明

張暉

司超

楊業并州太原人父信為漢麟州刺史業幼倜儻任俠善騎射好畋獵所獲倍於人嘗謂其徒曰我他日為將用兵亦猶用鷹犬逐雉免爾弱冠事劉崇為保衛指揮使以驍勇聞累遷至建雄軍節度使屢立戰

功所向克捷國人號爲無敵太宗征太原素聞其名嘗購求之旣而孤壘甚危業勸其主繼元降以保生聚繼元旣降帝遣中使召見業大喜以爲右領軍衛大將軍師還授鄭州刺史帝以業老於邊事復遷代州兼三交駐泊兵馬都部署帝密封橐裝賜予甚厚會契丹入鴈門業領麾下數千騎自西京而出由小陁至鴈門北口南嚮背擊之契丹大敗以功遷雲州觀察使仍判鄭州代州自是契丹望見業旌旗卽引去主將戍邊者多忌之有潛上謗書斥言其短帝覽之皆不問封其奏以付業雍熙三年大兵北征以忠

武軍節度使潘美爲雲應路行營都部署命業副之以西上閣門使蔚州刺史王侁軍器庫使順州團練使劉文裕護其軍諸軍連拔雲應寰朔四州師次桑乾河會曹彬之師不利諸路班師美等歸代州未幾詔遷四州之民於內地令美等以所部之兵護之時契丹國母蕭氏與其大臣耶律漢寧南北皮室及五押惕隱領衆十餘萬復陷寰州業謂美等曰今遼兵益盛不可與戰朝廷止令取數州之民但領兵出大石路先遣人密告雲朔州守將俟大軍離代州日令雲州之衆先出我師次應州契丹必來拒卽令朔州

民出城直入石碣谷遣强弩千人列於谷口以騎士
援於中路則三州之衆保萬全矣侁沮其議曰領數
萬精兵而畏懦如此但趨鴈門北川中鼓行而往文
裕亦贊成之業曰不可此必敗之勢也侁曰君侯素
號無敵今見敵逗撓不戰得非有他志乎業曰業非
避死蓋時有未利徒令殺傷士卒而功不立今君責
業以不死當爲諸公先將行泣謂美曰此行必不利
業太原降將分當死上不殺寵以連帥授之兵柄非
縱敵不擊蓋伺其便將立尺寸功以報國恩今諸君
責業以避敵業當先死於敵因指陳家谷口曰諸君

於此張步兵强弩爲左右翼以援俟業轉戰至此即
以步兵夾擊救之不然無遺類矣美即與侁領麾下
兵陣於谷口自寅至巳侁使人登托邏臺望之以爲
契丹敗走欲爭其功即領兵離谷口美不能制乃緣
交河西南行二十里俄聞業敗即麾兵却走業力戰
自午至暮果至谷口望見無人即拊膺大慟再率帳
下士力戰身被數十創士卒殆盡業猶手刃數十百
人馬重傷不能進遂爲契丹所擒其子延玉亦沒焉
業因大息曰上遇我厚期討賊捍邊以報而反爲姦
臣所迫致王師敗績何面目求活耶乃不食三日死

帝聞之痛惜甚俄下詔曰執干戈而衛社稷聞鼓鼙而思將帥盡力死敵立節邁倫不有追崇曷彰義烈故雲州觀察使楊業誠堅金石氣激風雲挺隴上之雄才本山西之茂族自委戎乘式資戰功方提貔虎之師以効邊陲之用而羣帥敗約援兵不前獨以孤軍陷於沙漠勁果姦厲有死不回求之古人何以加此是用特舉徽典以旌遺忠魂而有靈知我深意可贈太尉大同軍節度賜其家布帛千匹粟千石大將軍潘美降三官監軍王侁除名隸金州劉文裕除名隸登州業不知書忠烈武勇有智謀練習攻戰與士

卒同甘苦代北苦寒人多服氍毹業但挾纊露坐理軍事傍不設火侍者殆僵仆而業怡然無寒色爲政簡易御下有恩故士卒樂爲之用朔州之敗麾下尚百餘人業謂曰汝等各有父母妻子與我俱死無益也可走還報天子衆皆感泣不肯去淄州刺史王貴殺數十人矢盡遂死餘亦死無一生還者聞者皆流涕業旣沒朝廷錄其子供奉官延朗爲崇儀副使次子殿直延浦延訓並爲供奉官延環延貴延彬並爲殿直

延昭本名延朗後改焉幼沉默寡言爲兒時多戲爲

軍陣業嘗曰此兒類我每征行必以從太平興國中
補供奉官業攻應朔延昭爲其軍先鋒戰朔州城下
流矢貫臂鬪益急以崇儀副使出知景州時江淮凶
歉命爲江淮南都巡檢使改崇儀使知定遠軍徙保
州緣邊都巡檢使就加如京使咸平二年冬契丹擾
邊延昭時在遂城城小無備契丹攻之甚急長圍數
日契丹母督戰衆心危懼延昭悉集城中丁壯登陴
賦器甲護守會大寒汲水灌城上旦悉爲冰堅滑不
可上契丹遂潰去獲其鎧仗甚衆以功拜莫州刺史
時真宗駐大名傅潛握重兵頓中山延昭與楊嗣石普

屢請益兵以戰潛不許及潛抵罪召延昭赴行在屢
得對訪以邊要帝甚悅指示諸王曰延昭父業爲前
朝名將延昭治兵護塞有父風深可嘉也厚賜遣還
是冬契丹南侵延昭伏銳兵於羊山西自北掩擊且
戰且退及西山伏發契丹衆大敗獲其將函首以獻
進本州團練使與保州楊嗣並命帝謂宰相曰嗣及
延昭並出疎外以忠勇自效朝中忌之者衆朕力爲
保庇以及於此五年契丹侵保州延昭與嗣提兵將
之未成列爲契丹所襲軍士多喪失命李繼宣王何
代之將治其罪帝曰嗣輩素以勇聞將使其後效悉

宥之六年夏契丹復侵望都繼宣逗遛不進坐削職
復命延昭爲都巡檢使時講防秋之策詔嗣及延昭
條上利害又徙寧邊軍部署景德元年詔益延昭兵
滿萬人如契丹騎入寇則屯靜安軍之東令莫州部
署石普屯馬村西以護屯田斷黑盧口萬年橋敵騎
奔衝之路仍會諸路兵犄角追襲令魏能張凝田敏
竒兵牽制之時王超爲都部署聽不隸屬延昭上言
契丹頓澶淵去北境千里人馬俱乏雖衆易敗凡有
剽掠率在馬上願飭諸軍扼其要路衆可殲焉即幽
易數州可襲而取奏入不報乃率兵抵遼境破古城

俘馘甚衆及請和真宗選邊州守臣御筆錄以冢宰
相命延昭知保州兼綠邊都巡檢使二年追叙守禦
之勞進本州防禦使俄徙高陽關副都部署在屯所
九年延昭不達吏事軍中牒訴常遣小校周正治之
頗爲正所罔因緣爲姦帝知之斥正還營而戒延昭
焉大中祥符七年卒年五十七延昭智勇善戰所得
奉賜悉犒軍未嘗問家事出入騎從如小校號令嚴
明與士卒同甘苦遇敵必身先行陣克捷推功於下
故人樂爲用在邊防二十餘年契丹憚之目爲楊六
郎及卒帝嗟悼之遣中使護櫬以歸河朔之人望

樞而泣錄其三子官其常從門客亦試藝甄叙之子
文廣

文廣字仲容以班行討賊張海有功授殿直范仲淹
宣撫陝西與語竒之置麾下從狄青南征知德順軍
爲廣西鈐轄知宜邕二州累遷左藏庫使帶御器械
治平中議宿衛將英宗曰文廣名將後且有功迺擢
成州團練使龍神衛四廂都指揮使遷興州防禦使
秦鳳副都總管韓琦使築篳篥城文廣聲言城噴珠
率衆急趣篳篥比暮至其所部分已定遲明敵騎大
至知不可犯而去遺書曰當白國主以數萬精騎逐

汝文廣遣將襲之斬獲甚衆或問其故文廣曰先人
有奪人之氣此必爭之地彼若知而據之則未可圖
也詔書褒諭賜襲衣帶馬知涇州鎮戎軍爲定州路
副都總管遷步軍都虞候遼人爭代州地界文廣獻
陣圖并取幽燕策未報而卒贈同州觀察使

王貴者并州太原人廣順初補衛士宋初累遷至散
員都指揮使馬步軍都軍頭領勝州刺史太平興國
二年出爲淄州刺史受詔從潘美北征攻沁州頗立
戰功及從楊業爲遼兵所圍親射殺數十人矢盡張
空拳又擊殺數人遂遇害年七十三擢其子文晟供

奉官文昱殿直

荆罕儒冀州信都人父基王屋令罕儒少無賴與趙鳳張輦爲羣盜晉天福中相率詣范陽委質燕王趙延壽得掌親兵開運末延壽從契丹主德光入汴署罕儒密州刺史漢初改山南東道行軍司馬周廣順初爲率府率奉朝請貧不能振顯德初世宗戰高平戮不用命者因求驍勇士通事舍人李延傑以罕儒聞卽召赴行在命爲招收都指揮使會征太原命罕儒率步卒三千先入敵境罕儒令人負束芻徑趨太原城焚其東門擢爲控鶴弩手大劔直都指揮使從

平淮南領光州刺史改泰州爲下蔡守禦都指揮使兼舒蘄二州招安巡檢使四年泰州初下真拜刺史兼海陵鹽城兩監屯田使明年三月世宗幸泰州以罕儒爲團練使賜金帶銀器鞍勒馬六年春軍吏者艾詣闕請留恭帝詔褒之建隆初陞鄭州防禦以罕儒爲使改晉州兵馬鈐轄罕儒恃勇輕敵嘗率騎深入晉境人多閉壁不出虜獲甚衆是年冬復領千餘騎抵汾州城下焚其草市案兵以退夕次京土原劉鈞遣大將郝貴超領萬餘衆襲罕儒黎明及之罕儒遣都監擅毯副使閻彥進分兵以禦貴超罕儒錦袍

裏甲據胡牀享士方割羊臂臠以啖聞彥進小却卽
上馬麾兵徑犯賊鋒并人攢戈春之罕儒猶格鬪手
殺十數人遂遇害劉鈞素畏罕儒之勇當欲生致及
聞其死求殺罕儒者戮之太祖痛惜不已擢其子守
勲爲西京武德副使因索京土原之不效命者黜慈
州團練使王繼勲爲率府率閻彥進爲殿直斬其部
下龍捷指揮使石進德等二十九人罕儒輕財好施
在泰州有煮海之利歲入鉅萬詔聽十收其八用猶
不足家財入有籍出不問其數有供奉官張奉珪使
泰州自言後唐張承業之子罕儒曰我生平聞張特

進名幸而識其子厚加禮待遺錢五十萬米千斛罕
儒雖不知書好禮接儒士進士趙保雍登科覆落客
游海陵罕儒問其所欲保雍以將歸京師且言緣江
權務以絲易茗有厚利罕儒立命主藏奴令籍藏中
絲得四千餘兩盡以與之然好勇善戰不顧勝負常
欲削平太原志未果而及於敗人皆惜之罕儒兄延
福延福孫嗣

嗣乾德初應募爲控鶴卒從李繼勲討河東繼勲擇
悍勇百人間道截洛陽砦嗣出行間請行手斬五十
餘級賊焚砦宵遁進薄汾河賊將楊業扼橋路嗣與

衆轉戰賊退踰橋殺業所部兵千計射中業從騎獲
旗鼓鎧甲甚衆業退保城進焚南門奪羊馬城矢集
于面賊數千夜來薄砦繼勲選勇敢五百人接戰而
嗣爲寇及旦戰數合多所斬馘從太祖征太原賊來
拒焚洞子遣殿前楊信領百人援之嗣預焉率先陷
陣召見補御龍直太平興國初三遷至天武軍校太
宗再征太原嗣自陳願率一隊先登命主城西洞子
車駕巡師嗣登城手刃數賊足貫雙箭中手礮折二
齒太宗見之亟召賜錦袍銀帶從征幽州隸殿前崔
翰斬三十級補龍猛副指揮使五年契丹侵雄州據

龍灣堤嗣隸袁繼忠繼忠令率千兵力戰奪路內侍
有至州閱城壘者出郭外敵進圍之亟出兵接戰十
數合斬騎卒七百餘嗣軍夜相失在古城莊外三鼓
突敵圍壁於莫州城下又領百人斧敵望櫓斬五十
級敵爲橋界河將遁嗣邀擊之殺獲甚衆六年從崔
彥進捍契丹于靜戎北砦于慎與口彥進遣嗣率所
部渡河與契丹戰敗之追奔二十餘里八年李繼遷
寇邊嗣從袁繼忠田欽祚戍三全口爲前鋒斬賊千
餘追之獲牛羊鎧甲弓矢數千計進至萬井口狐路
谷餘賊復來請戰初以雄武千人爲後殿爲賊所掩

繼忠命嗣援之凡數戰始與雄武合隊因列陣格鬪復奪人馬七百餘欽祚夜還依山爲營賊亦砦其下募勁卒五十往襲之嗣爲其帥抵賊所刺殺百餘人焚其砦而還詔賜錦袍銀帶雍熙二年從田重進譚廷美率師入遼境疾戰飛狐口遼師不利重進引全師合擊遼騎引去進至飛狐城北遼將大鵬翼率衆復至重進陣壓東偏數戰不勝命嗣出西偏麾兵薄山崖以短兵接戰遼兵敗投崖而下手斬百餘級散卒千餘在野嗣呵止之悉斷弦折箬來降追至河槽復擊退餘衆屯土嶺裨將黃明與戰不勝將退嗣謂

之曰汝且頓兵於此爲我聲援我當奪此嶺遂力戰追奔五十餘里抵倉頭而還又領招收卒千人克倉頭小治二砦黃明與戰克直谷砦命嗣屯焉數日遼人復致師重進與戰奔突往來大軍頗擾重進召嗣合戰悉走之奪礮具鎧冑賊乘夜復圍直谷石門二砦重進遣嗣以精兵五百濟之嗣曰敵二萬餘今援師甚寡難以解圍重進頗憂之嗣曰譚師屯小治綰兵二千願間道以往邀其策應中夜匹馬詣廷美廷美曰敵勢若此何可解也嗣曰請移全軍就平川植旗立隊別擇三二百人張白旗於道側彼見旗幟綿

巨遠甚謂大軍繼至嗣自以所部五百疾驅往闔必克其砦廷美許焉一日凡五七戰遼兵遂引去咸如嗣所料蔚州之降也重進先命嗣率勇士數十人縋入見守將得其實狀翌日將受降而敵反拒大軍所出之路遂與闔殺傷甚衆屢縋入城取守將之歸服者重進之壘糧運頗乏嗣遣降卒輦州廩濟之遼援兵大至副都指揮使江謙妄言惑衆嗣即斬之悉收兵斂輜重還重進砦與遼人轉戰時軍校五人其四悉鬪死至大嶺嗣與戰敗走之師還太宗引見便殿重進言其有勞補本軍都虞候又從李繼隆禦敵於

北平砦將赴滿城道遇敵疾戰俘獲甚衆又戰于鸞女祠繼隆遣步卒二千伏定州古城為敵所攻命嗣援之至唐河橋嗣扼橋路出戰解敵圍數重與伏兵合分為二隊背水為陣敵將于越率騎百餘隊臨烽臺求戰嗣整兵與戰數合得與繼隆會又陣於東偏大敗之繼隆以聞詔嘉獎之遷本軍都指揮使領澄州刺史至道二年加御前忠佐馬步軍頭屯定州遼人入侵隸范廷召提偏師捍遼兵於嘉山廷召徙高陽命嗣以兵二千為殿過平敵城遼衆十餘萬來嗣屢出戰及桑贊秦翰來援夜二鼓敵再至嗣曰彼不

利夜戰我當破其砦以趣大軍即與贛翰合勢戒所部望敵炬火多處并力衝之詰旦至瀛州咸平三年加領本州團練使出爲郎山路都巡檢使破敵砦於蒲陰俘獲甚衆四年命嗣領萬人斷西山路會敵遽至大兵不及進而止五年真拜蔡州團練使趙州部署踰年徙滄州是冬遼人入侵命率所部自齊州抵淄青警備景德初又命與劉漢凝田思明率兵至冀州防邊俄赴澶州行在所會遼人請和復遣還任歷鄆州鳳翔永興部署車駕幸亳州留爲舊城內同都巡檢使大中祥符七年改號州防禦使邠寧環慶副

部署卒嗣起行間以勞居方面經百五十餘戰歿克子信貴並爲左侍禁貴至內殿崇班

曹光實雅州百丈人父疇爲蜀靜南軍使控扼邛峽以捍蠻夷光實少武勇有膽氣輕財好施不事細行意豁如也疇卒光實嗣職遷永平軍節度管內捕盜遊奕使乾德中太祖命王全斌等平蜀俄而盜賊群起夷人張忠樂者嘗群行攻劫且憾光實殺其徒黨率衆數千中夜奄至環其居鼓譟竝進光實負其母揮戈突圍以出賊衆辟易不敢近賊殺其族三百餘口又發冢墓毀其棺槨光實詣全斌具以事白誓雪

冤憤時蜀中諸郡未下乃圖雅州地形要害兼陳用
兵攻取之策請官軍先下之全斌壯其志令率兵先
導果克其城獲忠樂而甘心焉全斌乃署光實爲義
軍都指揮使殘寇猶據沈黎光實以所部盡平之遂
以光實知黎雅二州兼都巡檢使安集勞來蠻族懷
之六年秋全斌遣入貢京師遂言境內安乂乞罷義
軍歸農太祖喜謂左右曰此蜀中傑俊也詔升殿勞
問久之以爲黎州刺史開寶三年改唐州刺史及平
交廣群盜未息以光實爲嶺南諸州都巡檢使既至
捕逐群盜海隅以寧太平興國二年就遷本州團練

使車駕征河東以光實知威勝軍事令調軍食光實
入告願提一旅奮銳先登帝曰資糧事重亦足宣力
也河東平命爲汾遼石沁等州都巡檢使五年改汝
州團練使大軍北征與藩美分道出鴈門光實爲前
鋒遇敵迎擊敗之斬首數千級優詔嘉獎李繼捧之
入朝也以光實爲銀夏綏麟府豐宥州都巡檢使繼
捧弟繼遷逃入蕃落爲邊患光實乘間掩襲至地斤
澤俘斬甚衆破其揆帳獲繼遷母妻及牛羊萬計繼
遷僅免使人給光實曰我數奔北勢窘不能自存矣
公許我降乎因致情款陳甥舅之禮期某日降於葭

蘆川光實信之且欲專其功不與人謀及期繼遷先設伏兵令十數人近城迎致光實光實從數百騎往赴之繼遷前導北行將至其地舉手麾鞭而伏兵應之光實遂遇害卒年五十五帝聞之驚悼贈賻加等以其子大理評事克讓爲右贊善大夫克恭爲殿直淳化二年又錄克巳爲奉職後至內殿承制克廣至閣門祇候從子克明

克明字堯卿旣生會敵攻百丈縣父光遠遇害姆抱克明匿葦蒲中得免旣長喜兵法善騎射從父光實奇之補爲衙內都虞候光實擊敵于葭蘆川戰歿克

明時護輜重在後聞光實死懼軍亂秘不發喪陽令人西來傳光實命還軍銀州而潛與僕張貴入敵中獲光實尸以還葬京師錄是顯名初蜀人留京師者禁不得還鄉里克明以母老聞道歸李順反聞克明將家子且有名欲脅以官克明携母遁山谷夜止神祠中夢有人叱之起旣覺而去賊果至及賊陷雅州克明募衆數萬人以迎王師遂復名山火井夾門等九縣分兵嘉眉邛三州立七砦以邀賊復收雅州斬六十餘人賊將何承祿等走雲南蜀平擢西頭供奉官黎州兵馬監押以餘寇未息權邛州駐泊巡檢明

年峽路潰卒鄧紹等復起攻雅州克明又平之還軍
邛州遇賊王珂戰于延貢鎮擊以矛中左踝後又設
伏山下以數十騎與賊接戰克明僞北而所部失期
伏不發克明挺身走賊追急乃倚大石引弓三發斃
三人由是獲免入朝改內殿崇班爲温台等七州都
巡檢使景德中蠻寇邕州改供備庫副使知邕州左
右江蠻洞三十六克明召其酋長諭以恩信是歲承
天節相率來集克明慰拊出衣服遺之感泣而去獨
如洪峒恃險不至克明諭兩江防遏使黃衆盈引兵
攻之斬其首領陸木前梟于市宜州澄海軍校陳進

反時鬱江暴漲州城摧圮克明率丁夫伐木爲連舫
維之水上狀如郭郭又多張旗幟浮巨棧陳兵其上
爲守禦備募溪峒兵三千而黃衆盈亦濟兵千五百
將趣象州會巡撫使曹利用約克明會兵行次貴州
遇賊大敗之斬首四百餘級賊平利用專其功代還
真宗問南方事對稱旨賜一子官遷供備庫使江淮
兩浙都大提舉捉賊克明使人捕賊輒出私錢資之
以故人人盡力視賊中趨勇者釋縛使還捕其黨前
後獲千餘人知江寧府張詠以其事聞賜錢四十萬
領平州刺史知辰州撫水蠻叛徙宜融桂昭柳象邕

欽廉白十州都巡檢使兼安撫使既至蠻酋獻藥一器曰谿峒藥藥箭中人以是解之可不死克明日何以驗之曰請試以雞犬克明日當試以人乃取藥箭刺首股而飲以藥卽死群蠻慙懼而去是年冬安撫都監王文慶馬玉出天河砦東克明與中人楊守珍出環州樟嶺西磴道危絕林木深阻蠻多伏弩以待玉所向力戰屢敗蠻軍是時朝廷意在招附數詔諭克明而克明亦憚深入屢移文止玉玉至如門圍爲蠻所扼不得進克明遷延顧望月餘乃至撫水州與知州蒙承貴等約盟而還未幾知桂州兼管勻谿峒公事始置溪峒司又奏閱廣南兩路土軍爲忠敢軍州人覆茅爲屋歲多火克明選北軍教以陶瓦又激江水入城以防火災代還知滁州徙鼎州會交趾李公蘊寇邕州以文思使復知邕州旣至遣人入交趾諭以利害公蘊拜表謝罪遷西上閣門使歷知登舒邵三州復徙鼎州卒

張暉幽州大城人後唐清泰初隸控鶴軍累遷奉國弩手都頭晉開運末與武行德奪契丹甲船於河陰行德領河陽以暉爲弩手指揮使復令引兵趣懷州契丹將遁去因領州軍漢祖入汴暉迎於滎陽授懷

州刺史乾祐初郢州刺史慕容業治多不法以暉爲
緣漢都巡檢使領唐州屯兵至郢州卽代業還京改
郢州刺史周廣順初劉崇寇晉絳召暉爲步軍左廂
排陣使師還改沂州刺史三年吏民詣闕舉留俄改
冀州會詔築李晏口東鹿安平博野百八橋武強等
城命暉護其役踰月而就從世宗征淮甸充壕砦都
指揮使旣拔楚泗卽授泗州未幾改耀州俄爲西南
面橋道使宋初從征澤潞爲行營壕砦使先登陷陣
事平遷華州團練使在郡頗有治狀建隆二年太原
未下詔入覲問計暉對曰澤潞經李筠之叛瘡痍未

復軍旅一興恐人力重困不若戢兵育民俟富庶而
後爲謀乃賜襲衣金帶鞍勒馬令還州朝廷方議伐
蜀遷鳳州團練使兼緣邊巡檢壕砦橋道使暉盡得
山川險易因密疏陳之太祖覽之大悅乾德二年大
軍西下乃以暉充西川行營先鋒都指揮使督兵開
大散關路躬撫士卒且役且戰人忘其勞十二月至
青泥嶺卒天禧五年暉妻年百五歲家貧詣闕自陳
詔賜束帛錄其孫永德爲三班借職

司趙大名元城人初事邢帥安叔于漢祖在太原趙
往依之隸帳下爲小校漢祖將渡河遣趙先領勁騎

由晉絳趨河陽及入汴以超爲鄆州必敵指揮使時
京東諸州寇盜充斥以超爲宋宿亳三州遊奕巡檢
使改宿州西固鎮守禦都指揮使移屯潁州下蔡鎮
屢與淮人戰有功周世宗命宰相李穀討淮南以超
爲步軍先鋒副都指揮使又爲廬壽光黃等州巡檢
使大敗淮人三十餘衆於盛唐縣獲權船四十餘艘
禽其監軍高弼果毅指揮使許萬以獻時黃州未下
卽命超遙領刺史兼樓櫓戰權右廂都校師還改光
州刺史敗吳軍千餘於麻城北顯德四年冬與王審
琦攻舒州敗吳軍三千先禽刺史施仁望獻於行在

卽以超爲舒州團練使宋初命副宋偃領舟師巡撫
江徼月餘特詔陞舒州爲防禦以超充使太祖討李
重進以爲前軍步軍都指揮使及平遣歸治所建隆
三年奉遷蔡州防禦使乾德六年改絳州防禦使徙
晉州兵馬鈐轄是秋又副趙贊爲邠州行營都部署
進攻河東及太祖親征爲行營前軍步軍都指揮使
改鄭州防禦使開寶七年朝廷將討江左以超久在
淮右習知江山險易徙蘄州防禦使行至淮西卒年
七十一天禧元年錄其孫文睿爲三班奉職
論曰昔許子卒於軍葬之加等春秋書之所以褒臣

節而傲官守也業罕儒光實咸當捍城之寄臨戎力戰歿于敵境雖罕儒恃勇不戒光實甘賊遷之言失在輕敵然其忘軀徇節誠可嘉也業本太原驍將感太宗寵遇思有以報常勝之家千慮一失然其素得士心部卒不忍離去從之以歿則忠義之風槩可見矣嗣與延昭並克紹勲代延昭久居邊閫總戎訓士威名方略聞于敵人於嗣為優暉於危時則有陷陣之功平日則獻息戎之諫超頻戰以清淮海其忠誠勇果率有可尚者焉

列傳卷第三十一

列傳卷第三十二

宋史二百七十二

開府儀同三司柱國魯國重事兼中書右丞相兼樞密使領經筵事都總裁臣脫脫等奉

勅修

李進卿 子延渥 楊美

何繼筠 子承矩

李漢超 子守恩 郭進 牛因進附

李謙溥 了允正

姚內斌 董遵誨 賀惟忠

馬仁瑀

李進卿并州晉陽人少以驍勇隸護聖軍晉天福中杜重威帥師敗安重榮於宗城進卿力戰有功擢為典順軍校周祖開國命領所部兵戍靈壽久之遷龍

捷指揮使顯德初從世宗戰高平改鐵騎指揮使歷散員左射都校改鐵騎及內殿直都虞候宋初領貴州刺史三遷鐵騎左廂都指揮使領乾州團練使乾德初遷控鶴左廂都指揮使改漢州團練使二年轉虎捷左廂都指揮使領澄州團練使是歲冬伐蜀以進卿為歸州路行營步軍都指揮使拔巫山砦下夔萬二州蜀平錄功拜侍衛親軍步軍都虞候領保順軍節度開寶二年太祖親征河東留進卿為在京都巡檢潁州刺史常暉淄州刺史韓光愿分為河南北巡檢及還改親軍馬軍都虞候六年遷步軍都指揮

使領靜江軍節度卒年五十九贈侍中子延渥延信

延信至內殿崇班

延渥以蔭補供奉官尋為閤門祇候三遷至西京左藏庫使咸平初歷知平戎寧邊順安軍保州威虜軍鈐轄又知冀州六年徙瀛州景德初契丹大舉擾邊經胡盧河踰關南十月抵城下晝夜鼓譟四面夾攻旬日其勢益張唯擊鼓伐木之聲相間驅奚人負板秉燭乘墉而上延渥率州兵強壯又集巡檢史普所部乘城發礮石巨木擊之皆累累而墜殺傷甚眾翌日契丹王與其母親鼓眾急擊發矢如雨延渥分兵

拒守益堅契丹遁去死者三萬餘傷者倍之獲鎧甲
兵矢竿牌數百萬驛書以聞賜延渥錦袍金帶將士
繙錢遷延渥本州團練使以通判太子中允陸元凱
爲國子博士賜緋推官李翔爲太子中允錄事參軍
蔡亨爲右贊善大夫侍禁兵馬監押王誨殿直具冀
同巡檢史普爲內殿崇班充職如故初戍棚垂板護
城纜數寸許契丹射之矢集其上凡二百餘及請葺
城詔取板視之真宗頗稱其勞又聞城守之際陸元
凱流矢中面史普勇敢不避敵復遷元凱屯田員外
郎普尚食副使普尋卒又錄其子昭度爲右侍禁昭

儉爲奉職二年延渥徙知邢州歷天雄軍貝州副都
部署知冀具博三州大中祥符八年入朝以疾連賜
告換右領軍衛大將軍領演州團練使明年從其請
以左武衛大將軍致仕天禧初卒子宗禹爲內殿崇
班

楊美并州文水人本名光美避太宗舊名改焉美狀
貌雄偉武力絕人以豪俠自仕漢乾祐中周祖征三
叛美杖策詣軍門求見周祖召與語壯之留帳下廣
順初累遷禁軍大校從世宗征淮南以功擢鐵騎都
指揮使領白州刺史太祖與美有舊卽位以爲內殿

直都知建隆三年升青州北海縣爲軍以美爲軍使
爲政尚簡易民皆德之乾德二年召還北海民數百
詣闕乞留詔諭之不去答爲首者始罷遷馬步軍都
頭會討蜀以美爲歸州路戰擢左右廂都指揮使蜀
平遷內外馬步軍副都軍頭領恩州團練使開寶二
年改領端州防禦使六年加都軍頭領宣州觀察使
俄授虎捷左右廂都指揮使領河西軍節度會遣党
進潘美征太原命美爲行營馬軍都虞候太平興國
二年冬出爲保靜軍節度三年夏以疾求解官歸京
師尋醫藥詔遣內侍與道士馬志視之未幾卒年四

十八贈侍中命中使護葬美爲人任氣好施凡得予
賜及奉祿盡調給親戚故舊死之日家無餘財人多
歎息之

何繼筠字化龍河南人父福進歷事後唐至周累官
忠武成德天平三節度繼筠幼時與羣兒戲必分行
伍爲戰陣之象晉初補殿直周祖討三叛表繼筠從
行賊平改供奉官廣順初福進鎮真定署衙內都校
嘗領偏師出土門與并人戰斬首數千級以功領欽
州刺史契丹將高模翰率二千騎擾深冀以葦棧度
胡盧河繼筠與虎捷都指揮使劉誠誨率兵拒之至

武強獲老稚千餘人模翰遁去俄隨福進入朝爲內
殿直都知福進卒起復爲濮州刺史領兵戍靜安軍
契丹內侵繼筠逆擊敗之改棣州刺史世宗征瓦橋
關命繼筠以所部兵出百井道破并人數千衆恭帝
即位以爲西北面行營都監建隆二年升棣州爲團
練以繼筠充使三年命爲關南兵馬都監乾德四年
加本州防禦使開寶元年秋命昭義節度李繼勳等
征太原以繼筠爲先鋒部署至渦河與并人遇擊走
之奪汾河橋敗其衆於城下獲馬五百匹擒其將張
環石贊以獻二年春太祖親征晉陽契丹來援繼筠

時屯兵陽曲縣驛召至行在所授以方略命將精騎
數千赴石嶺關拒契丹謂之曰翌日亭午俟卿來奏
捷也至期帝御北臺以俟見一騎自北來亟遣逆問
之乃繼筠子承睿來獻捷生擒刺史二人獲生口百
餘斬首千餘級馬七百餘匹器甲甚衆初并人恃契
丹為聲援及捷奏太祖命以所獲首級鎧甲示城下
并人喪氣繼筠以功拜建武軍節度判棣州三年來
朝詔賜鞍馬戎仗令戍邊四年秋來朝疽發背車駕
幸其第錫賚甚厚未幾卒年五十一帝親臨之爲之
流涕從容謂侍臣曰繼筠捍邊有功朕不早授方鎮

者慮其數竒耳今纔領節制果至淪沒良可惜也贈
侍中賻絹五百匹中使護喪令以生平所佩劔及介
冑同葬繼筠深沉有智略前後備邊二十年與士卒
同甘苦得其死力善揣邊情邊人畏伏多畫像祠之
子承矩

承矩字正則幼爲棣州衙內指揮使從繼筠討劉崇
擒其將胡澄以獻開寶四年授開廐副使太平興國
三年漳泉陳洪進納土詔承矩乘傳監泉州兵會仙
遊莆田百丈寇賊嘯聚承矩與喬維岳王文寶討平
之以功就遷開廐使疏爲政之害民者數十事上之

悉被容納會改使名卽爲崇儀使五年知河南府時
調丁男百十輩轉送上供綱承矩以爲橫後奏罷其
事徙知潭州凡六年因園屢空詔嘉獎之入爲六宅
使端拱元年領潘州刺史命護河陽屯兵米信知滄
州以其不習吏事命承矩知節度副使實專郡治時
契丹撓邊承矩上疏曰臣幼侍先臣關南征行熟知
北邊道路川源之勢若於順安砦西開易河蒲口導
水東注于海東西三百餘里南北五七十里資其陂
澤築隄貯水爲屯田可以遏敵騎之奔軼俟期歲間
關南諸泊悉壅闡卽播爲稻田其緣邊州軍臨塘水

者止留城守軍士不煩發兵廣成收地利以實邊設
險固以防塞春夏課農秋冬習武休息民力以助國
經如此數年將見彼弱我強彼勞我逸此禦邊之要
策也其順安軍以西抵西山百里許無水田處亦望
選兵戍之簡其精銳去其冗繆夫兵不患寡患驕慢
而不精將不患怯患偏見而無謀若兵精將賢則四
境可以高枕而無憂太宗嘉納之屬霖雨為災典者
多議其非便承矩引援漢魏至唐屯田故事以折衆
論務在必行乃以承矩為制置河北緣邊屯田使俾
董其役事具食貨志由是自順安以東瀕海廣袤數

百里悉為稻田而有莞蒲蜃蛤之饒民賴其利淳化
四年擢為西上閤門使知滄州踰年徙雄州御書印
紙錄其功最仍賜以弓劍承矩推誠御衆同其甘苦
邊民有告機事者屏左右與之款接無所猜忌故契
丹動息皆能前知至道元年契丹精騎數千夜襲城
下伐鼓縱火以逼樓堞承矩整兵出拒遲明列陣酣
戰久之斬馘甚衆擒其酋所謂鐵林相公者契丹遁
走是年春府州嘗敗契丹衆承矩條殺獲以諭州民
或揭於市契丹愧忿故有是役太宗意其輕率致寇
復命與滄州安守忠兩換其任魏廷式使河北得雄

州功狀抗表上言又遣內侍劉勅覈實及麾下士有功者千餘人皆進擢賚賜真宗嗣位復遣知雄州賜承矩詔曰朕嗣守鴻業惟懷永圖思與華夷共臻富壽而契丹自太祖在位之日先帝繼統之初和好往來禮幣不絕其後尅復汾晉疆臣貪地爲國生事信好不通今者聖考上仙禮當訃告汝任居邊要洞曉詩書凡有事機必能詳究輕重之際務在得中承矩貽書契丹諭以懷來之旨然未得其要咸平二年契丹南侵屢遣內侍以密詔問禦遏之計密封以獻嘗詔聽邊民越拒馬河塞北市承矩上言曰緣邊戰擢司自淘河至泥姑海口屈曲九百餘里此天險也太宗置砦一十六舖百二十五廷臣十一人戍卒三千餘部舟百艘往來巡警以屏姦詐則緩急之備大爲要害今聽公私貿易則人馬交度深非便宜且砦舖皆爲虛設矣疏奏即停前詔屢被手札褒飭三年召還拜引進使州民百餘詣闕貢馬乞借留承矩詔書嘉獎復遣之承矩上言曰契丹輕而不整貪而無親勝不相讓敗不相救以馳騁爲容儀以弋獵爲耕釣櫛風沐雨不以爲勞露宿草行不以爲苦復恃騎戰之利故頻年犯塞臣聞兵有三陣日月風雲天陣也

山陵水泉地陣也兵車士卒人陣也今用地陣而設險以水泉而作固建設陂塘綿亘滄海縱有敵騎安能折衝昨者契丹犯邊高陽一路東負海西抵順安士庶安居即屯田之利也今順安西至西山地雖數軍路纔百里縱有丘陵岡阜亦多川瀆泉源因而廣之制爲塘埭自可息邊患矣今緣邊守將多非其才不悅詩書不習禮樂不可守疆界制御無方動誤國家雖提貔虎之師莫遏犬羊之衆臣按兵法凡用兵之道校之以計而索其情謂將孰有能天地孰得法令執行兵衆孰強士卒孰練賞罰孰明此料敵制

勝之道也知此而用戰者必勝否則必敗夫惟無慮而易敵者必擒於人也伏望慎擇疆吏出牧邊民厚之以奉祿使悅其心借之以威權使嚴其令然後深溝高壘秣馬厲兵爲戰守之備修仁立德布政行惠廣安輯之道訓士卒闢田疇勸農耕畜芻粟以備凶年完長戟修勁弩謹烽燧繕保戍以防外患來則禦之去則備之如此則邊城按堵矣臣又聞古之明王安集吏民順俗而教簡募良材以備不虞齊桓晉文皆募兵以服鄰敵故強國之君必料其民有膽勇者聚為一卒樂進戰効力以顯忠勇者聚為一卒能踰

高赴遠輕足善鬪者聚為一卒此三者兵之練銳內
出可以決圍外入可以屠城况小大異形強弱異勢
險易異備卑身以事強小國之形也以蠻夷伐蠻夷
中國之形也故陳湯統西域而郅支滅常惠用烏孫
而邊部寧且聚膽勇樂戰輕足之徒古稱良策請試
行之且邊鄙之人多負壯勇識外邦之情偽知山川
之形勝望於邊郡置營召募不須品度人才止求少
壯有武藝者萬人俟契丹有警令智勇將統而用之
必顯成功乃中國之長筭也又如權場之設蓋先朝
從權立制以惠契丹縱其渝信犯盟亦不之廢似全

大體今緣邊權場因其犯塞尋即停罷去歲以臣上
言於雄州置場賣茶雖貨貨並行而邊氓未有所濟
乞延訪大臣議其可否或文武中有抗執獨議是必
別有良謀請委之邊任使施方畧責以成功苟空陳
浮議上惑聖聰祗如靈州足為證驗况茲契丹又非
夏州之比也四年十月建議選銳兵於乾寧軍挽刀
魚船自界河直趣平州境以牽西面之勢五年詔兼
領制置屯田使始建權場或者謂承矩意在繼好然
契丹無厭未足誠信徒使公行窺伺會契丹有殺斥
候卒者復罷之時契丹數窺邊城大浚渠頗撓其後

詔承矩握兵深入其境以分其勢承矩以無騎兵第
遣數千卒出混泥城襲之而還景德元年入朝進領
英州團練使真宗謂宰相曰承矩讀書好名以才能
自許宜擇善地處之冬出知澶州承矩自守邊以來
嘗欲朝廷懷柔遠人為息兵之計及是車駕按巡本
部卒與契丹和益加款賞韓杞之至也命郊勞之明
年春復知雄州是歲契丹始遣使奉幣承矩以朝廷
待邊人之禮悠久可行者悉疏以聞手詔嘉納仍聽
事有未盡者便宜裁處三年真拜雄州團練使時邊
兵稍息農政未修又畧緣邊安撫使命承矩為之且

詔邊民誘其復業承矩曰契丹聞之必謂誘其部屬
也乃易詔文為水旱流民之意王欽若時知樞密援
漢蟲達周仲居改詔請罪承矩帝曰承矩任邊有功
當優假之第詔自今朝旨未便者奏稟進止承矩頗
有識鑒典長沙日李沆王旦為佐承矩厚待之以為
有公輔器善推步自知冥數乃以老疾求僻郡詔自
擇其代承矩以李允則為請乃授承矩齊州團練使
遣之任至郡裁七日卒年六十一特贈相州觀察使
賻錢五十萬絹五百匹中使護葬以其子龜齡為侍
禁昌齡九齡為殿直遐齡為齋郎緣邊泊涿易州民

聞承矩卒皆相率詣雄州發哀飯僧昌齡娶齊王女
太和縣主至內殿崇班昌齡子象中爲閣門祇候
李漢超雲州雲中人始事鄴帥范延光不爲所知又
事鄆帥高行周亦不見親信會周世宗鎮澶淵漢超
遂委質焉即位補殿前指揮使三遷殿前都虞候宋
初改散指揮都指揮使領綿州刺史累遷控鶴左廂
都校領恩州團練使從平李重進等遷齊州防禦使
兼關南兵馬都監漢超仕關南人有訟漢超強取其
女爲妾及貸而不償者太祖召而問之曰汝女可適
何人曰農家也又問漢超未至關南契丹如何曰歲

苦侵暴曰今復爾邪曰否太祖曰漢超朕之貴臣也
爲其妾不猶愈於農婦乎使漢超不守關南尚能保
汝家之所有乎責而遣之密諭漢超曰亟還其女拜
所貸朕姑貰汝勿復爲也不足於用何不以告朕邪
漢超感泣誓以死報在郡十七年政平訟理吏民愛
之詣闕求立碑頌德太祖詔率更令徐鉉撰文賜之
霸州監軍馬仁瑀嘗兄事漢超多自肆擅發麾下卒
入遼境剽奪人口羊馬由是二將交惡太祖慮其生
變遣中使賜漢超仁瑀金帛令和解之太平興國初
遷應州觀察使判齊州仍爲關南巡檢二年八月卒

於屯所太宗甚悼惜贈太尉忠武軍節度中使護葬
漢超善撫士卒與之同甘苦死之日軍中皆流涕子
守恩

守恩少驍果善戰有父風初補齊州牙職開寶二年
太祖親征太原漢超爲北面行營都監守恩從父軍
中會契丹遣兵援河東至定州西嘉山將入土門守
恩領牙兵數千騎戰敗之斬首三千級獲戰馬器甲
甚衆擒首領二十七人隨漢超見于行在賜戎服金
帶器幣緡錢太祖謂左右曰此稚子能若是他日將
帥才也漢超卒擢爲驍猛軍校累官至隴州刺史知

靈州與轉運使陳緯部芻糧過瀚海爲賊所邀守恩
及子廣文助教象之隴州衙內指揮使望之弟寄班
守忠皆沒真宗聞之震悼特贈守恩洪州觀察使次
子祐之頃之用之潤之慶之成之藏之

郭進深州博野人少貧賤爲鉅鹿富家傭保有膂力
倜儻任氣結豪俠嗜酒蒲博其家少年患之欲圖殺
進婦竺氏陰知其謀以告進遂走晉陽依漢祖漢祖
壯其材留帳下晉開運末契丹邊漢祖建號太原

契丹主道殂漢祖將入汴進請以奇兵間道先趨洛
州因定河北諸郡累遷乾坊二州刺史少帝即位改

宋史列傳卷第三十二
磁州周廣順初移淄州二年吏民詣觀察使舉留是
秋遷登州刺史會群盜攻劫居民進率鎮兵平之部
內清肅民吏千餘人詣闕請立屏盜碑許之顯德初
移衛州衛趙邢洺間多亡命者以汲郡依山帶河易
爲出沒伺間椎剽吏捕之輒遁去故累歲不能絕其
黨類進備知其情狀因設計終擿之數月間剪滅無
餘郡民又請立碑記其事改洺州團練使有善政郡
民復詣闕請立碑頌德詔左拾遺鄭起撰文賜之進
嘗於城四面植柳壕中種荷芰蒲葦亂後益繁茂郡民
見之有垂涕者曰此郭公所種也建隆初太祖親征

澤潞遷本州防禦使文西山巡檢嘗與曹彬王全斌
入太原境獲數千人開寶二年太祖親征河東以進
爲行營前軍馬軍都指揮使九年命將征河東以進
爲河東道忻代等州行營馬步軍都監招徠山後諸
州民三萬七千餘口太平興國初領雲州觀察使判
邢州仍兼西山巡檢賜京城道德坊第一區四年車
駕將征太原先命進分兵控石嶺關為都部署以防
北邊契丹果犯關進大破之攻破西龍門砦俘馘來
獻自是并人喪氣時田欽祚護石嶺軍恣為姦利諸
不法事進雖力不能禁亦屢形於言進武人性剛烈

戰功高欽祚以他事侵之心不能甘自經死年五十八欽祚以暴卒聞太宗悼惜久之贈安國軍節度中使護塋後頗聞其事因罷欽祚內職出爲虜州團練使進有材幹輕財好施然性喜殺士卒小違令必寘於死居家御婢僕亦然進在西山太祖遣戍卒必諭之曰汝輩謹奉法我猶貸汝郭進殺汝矣其御下嚴毅若此然能以權道任人嘗有軍校自西山詣闕誣進者太祖詰知其情狀謂左右曰彼有過畏罰故誣進求免爾遣使送與進令殺之會并人入寇進謂誣者曰汝敢論我信有膽氣今捨汝罪能掩殺并寇即

薦汝於朝如敗可自拔河東其人踴躍聽命果致捷進即以聞乞遷其職太祖從之初開寶中太祖令有司造宅賜進悉用甬瓦有司言舊制非親王公主之第不可用帝怒曰進控扼西山十餘年使我無北顧憂我視進豈減兒女耶亟往督役無妄言太平興國初又賜宅一區

牛思進者祁州無極人少從軍以膂力聞嘗取強弓絃於耳以手引之令滿又負墻立力士二人撮其乳曳之疑不動軍中咸異之太平興國四年知平定軍從征河東石嶺關部署郭進卒命思進代之師還以

功改本州團練使七年授右千牛衛上將軍致仕卒
李謙溥字德明并州孟人性慷慨重然諾父堯後唐
清泰中晉祖鎮并門署為參謀天福初為開封府推
官使契丹還上言屈節外國非久長策時晉祖方父
事契丹不悅其言出為汝州魯山令卒官謙溥少通
左氏春秋從晉祖入汴補殿直奉使契丹少帝即位
改西頭供奉官漢初遷東頭周祖討三叛及守鄴都
謙溥往來宣密命周祖愛之廣順初遷供備庫副使
世宗征劉崇遼州刺史張乙堅壁不下遣謙溥單騎
說之乙以城降以功改開廐使師還留為晉州兵馬

都監以偏師入河東境頻致克捷世宗詔襲之會隰
州刺史孫義卒時世宗親征淮南謙溥謂節帥楊廷
璋曰大寧咽喉要地不可闕守且車駕出征若俟報
則孤城陷矣廷璋即署謙溥權隰州事至郡亟命浚
城隍嚴兵備凡八日并人果以數千騎來寇時盛夏
謙溥單衣持扇從二小吏登城徐步按視戰具并人
退舍後旬餘大發衝車攻城謙溥募敢死士得百餘
人短兵堅甲銜枚夜縋出城會廷璋兵至合勢夾攻
掩其不及并人大擾悉衆遁去追北數十里斬首千
餘級時顯德四年也明年五月攻破孝義縣以功領

衢州刺史監軍如故世宗北征召赴行在恭帝即位
為澶州巡檢使詔城莫州數旬而就改丹州刺史建
隆四年移慈州兼晉隰緣邊都巡檢行石州事以興
同砦為治所冬將有事于南郊太祖命四路進兵略
地太原鄭州刺史孫延進絳州刺史沈繼深通事舍
人王濬等師出陰地以謙溥為先鋒會霍邑謙溥因
畫攻取之策繼深等共沮之延進不能用軍還出白
壁關次谷口謙溥語諸將曰王師深入敵境今既退
軍彼必乘我諸君當備之諸將不答謙溥獨令所部
探甲俄追騎果至延進等倉卒走谷中獨謙溥麾兵

拒之并人引退未幾移隰州刺史開寶元年命李繼
勳等征太原以謙溥為汾州路都監太祖征晉陽為
東砦都監前軍副部署黨進遣謙溥伐木西山以給
軍用未至聞鼓聲乃并人逼西砦大將趙贊禦之并
衆未退謙溥麾所部赴之太祖遽至觀戰怪其赴援
者非精甲問之乃謙溥也帝甚喜謙溥在州十年敵
人不敢犯境有招收將劉進者勇力絕人謙溥撫之
厚藉其死力往來境上以少擊衆并人患之為蠟丸
書以間進佯遺書道中晉帥趙贊得之以聞太祖令
械進送闕下謙溥詰其辜進伏請死謙溥曰我以舉

宗四十口保汝矣即上言進為井人所惡此乃反間也奏至帝悟遽令釋之賜以禁軍都校戎帳服具進感激願擊敵自効開寶三年召謙溥為濟州團練使後邊將失律復為晉隰緣邊巡檢使邊民間之喜爭相迎勞於道左六年領兵入太原連拔七砦八年以疾求歸肩輿抵洛太祖遣中使領大醫就視之至京師疾篤累上章辭祿不許明年春卒年六十二太祖甚痛惜之賻贈有加葬事官給謙溥與宣祖同里閈弟謙昇與太祖為布衣衮其母閹嘗厚待太祖及即位數迎入宮中使左右掖之下令拜命坐飲食話及

舊故賜賚優厚雍熙中太宗為許王納謙昇女為夫人以謙昇為如京副使謙溥子允則允正允則至寧州防禦史從子允恭為內殿崇班閤門祇候允正字脩已以蔭補供奉官太平興國中掌左藏庫屢得升殿奏事太宗頗記憶其舊故雍熙中與張平同掌三班俄為閤門祇候四年遷閤門通事舍人時女弟適許王以居第質于宋俛太宗詰之曰爾父守邊二十餘年止有此第耳何以質之允正具以奏即遣內使輦錢贖還摺紳咸賦詩頌美淳化中命討戎瀘州叛蠻遷西上閤門副使太宗慮京城獄囚淹繫

命允則提總之常請詔御史臺給開封府司錄司左
右軍巡四排岸司印紙作囚簿署禁繫日月條其罪
犯歲滿較其殿直詔從其請踰年開封府上言京師
浩穰禁繫尤衆御史府考較之際吏胥奔命有如推
鞠况無欺隱不煩推較卒罷之允正又提點左右藏
屢乘傳北面經度邊要五年爲衛州修河部署會建
清遠軍積石砦命詣瀚海部分其役還拜西上閤門
使并州駐泊鈐轄俄代張永德知州事徙代州咸平
初使西蜀詢訪民事還進秩東上閤門使歷知鎮莫
二州又爲并代馬步軍鈐轄契丹擾邊車駕駐大名

允正與高瓊率太原軍出土門路來會召見便殿所
部有廣銳騎士數百皆素練習命允正引以入賜緡
錢遣屯邢州與石保吉逐遼人遼人遁去俄以兵會
大名復還并代五年合涇原儀渭邠寧環慶路爲一
界命王漢忠爲都部署驛召允正爲鈐轄兼安撫都
監即日上道又命與錢若水同詣洪德懷安沿邊諸
砦經度邊事加領誠州刺史七月罷兩路之職復任
并代鈐轄尋錢若水按巡邊壘即詔權涖州事進四
方館使代馬知節爲廊延部署兼知延州改客省使
知定州兼鎮定都鈐轄大中祥符三年累表求還至

京師將紀汾陰以疾難於扈從命爲河陽部署以便
養會張崇貴卒趙德明頗踰軼亟詔徙允正爲鄜延
部署內侍密詔存諭禮成領河州圍縛使允正頗知
書性嚴毅疎材喜自脩飭素病尙悽以是罕在要近
累典邊任多殺戮是秋徙知永興軍卒年五十一
姚內斌平州盧龍人仕契丹爲關西巡檢瓦橋關使
周顯德六年太祖從世宗北征兵次瓦橋關內斌率
衆五百人以城降世宗以爲汝州刺史吏民詣關舉
留恭帝詔褒之內斌本名犯宣阻諱下一字遂改今
名從平李筠改號州刺史西夏數犯西鄙以內斌爲

慶州刺史兼青白兩池榷鹽制置使在郡十數年西
夏畏伏不敢犯塞號內斌爲姚大蟲言其武猛也初
內斌降其妻子皆在契丹乾德四年子承贊密自幽
州來歸五年幽州民田光嗣等又以內斌兒女六人
間道來歸太祖並召見賜以衣服緡錢鞍馬令中使
護送還內斌開寶四年召赴闕上待之甚厚遣歸治
所七年春暴得疾卒年六十四遣中使護喪歸葬洛
陽常賻外賜其子田三十頃承贊爲供奉官閣門祗
候歿于陣承鑒至殿中丞

董遵海涿州范陽人父宗本善騎射隸契丹帥趙延

壽麾下嘗以事說延壽不能用及延壽被執舉族南奔漢祖得之擢拜隨州刺史署遵誨隨州牙校周顯德初世宗北征大將高懷德遵誨之舅也表遵誨從行師次高平與晉人遇將接戰晉兵未成列懷德命遵誨先出奇兵擊之晉人潰大軍繼進遂敗之二年討秦鳳大將韓通又表遵誨自隨與賊戰于唐倉先登陷陣擒蜀招討使王鸞以獻克秦鳳二州師還錄其前後功補東西班押班又遷驍武指揮使四年從世宗征淮南攻合肥下之六年從韓通平雄霸二州太祖微時客遊至漢東依宗本而遵誨憑藉父勢太

祖每避之遵誨嘗謂太祖曰每見城上紫雲如蓋又夢登高臺遇黑蛇約長百尺餘俄化龍飛騰東北去雷電隨之是何祥也太祖皆不對他日論兵戰事遵誨理多屈拂衣而起太祖迺辭宗本去自是紫雲漸散及卽位一日便殿召見遵誨伏地請死帝令左右扶起因諭之曰卿尚記往日紫雲及龍化之夢乎遵誨再拜呼萬歲俄而部下有軍卒擊登聞鼓訴其不法十餘事太祖釋不問遵誨益惶愧待罪太祖召而諭之曰朕方赦過賞功豈念舊惡耶汝可勿復憂吾將錄用汝遵誨再拜感泣又問遵誨母安在遵誨奏

宋史列傳卷三十三
三十三
曰母氏在幽州經患難睽隔太祖因令人賂邊民竊
迎其母送與遵誨遵誨遣外弟劉綜貢馬以謝太祖
解其所服真珠盤龍衣命齋賜之綜曰遵誨人臣豈
敢當此太祖曰吾方委之方面不此嫌也會李筠叛
澤潞令遵誨從慕容延釗討之遷馬軍都軍頭因留
之鎮守三年召歸再遷爲散員都虞候乾德六年以
西夏近邊授通遠軍使遵誨旣至召諸侯酋長諭以
朝廷威德刲羊醜酒宴犒甚至衆皆悅服後數月復
來擾邊遵誨率兵深入其境擊走之俘斬甚衆獲羊
馬數萬夷落以定太祖嘉其功就拜羅州刺史如故

太宗卽位兼領靈州路巡檢遵誨不知書豁達無崖
岸多方略能挽強命中武藝皆絕人在通遠軍九十
四年安撫一面夏人悅服嘗有剽略靈武進奉使鞍
馬兵器者遵誨部署帳下欲討之夏人懼盡歸所略
拜伏請罪遵誨卽慰撫令去自是各謹封略秋毫不
敢犯歷太祖太宗朝委遇始終不替許以便宜制軍
事太平興國六年卒年五十六帝軫悼久之遣中使
護葬賙賻加等錄其子嗣宗嗣瑩爲殿直
賀惟忠忻州定襄人少勇敢善騎射周祖將兵討三
叛惟忠謁於道左自陳其有武藝周祖悅之卽留置

所部洎開國得隸世宗帳下奏補供奉官不辭輒入朝世宗怒之及嗣位終不遷擢初授儀鸞副使令知易州捍邊有功尋遷正使開寶二年太祖駐常山以惟忠爲本州刺史兼易定邠等州都巡檢使嘗中流矢六年金瘡發而卒太祖聞之嗟悼卽以其子昭度爲供奉官惟忠性剛果知書洞曉兵法有方略在易州繕完亭障撫士卒得其死力每乘塞用兵所向必克威名震北邊故十餘年間契丹不敢南牧昭度至西京作坊使淳化中知通遠軍有罪當棄市減死流商州

馬仁瑀大名夏津人十餘歲時其父令就學輒逃歸又遣於鄉校習孝經旬餘不識一字博士笞之仁瑀夜中獨往焚學堂博士僅以身免常集里中羣兒數十人與之戲爲行陣之狀自稱將軍日與之約鞭其後期者羣兒皆畏伏又市果均給之益相親附及長善射挽弓二百斤漢乾祐中周祖鎮鄴仁瑀年十六願隸帳下周祖素聞其勇旣見甚喜留置左右廣順初補內殿直世宗嗣位命衛士習射苑中仁瑀弓力最勁而所發多中賜錦袍銀帶會太原劉崇入寇世宗親征至高平周師不利諸將多引退仁瑀謂衆曰

主辱臣死安用我輩乃控弦躍馬挺身出陣射賊斃者數十人土氣益振大軍乘之崇遂敗績世宗至上黨諸將坐失律誅者七十餘人擢仁瑀爲弓箭控鶴直指揮使及還京又遷散指揮使從征淮南至楚州攻水砦砦中建飛樓高百尺餘世宗觀之相去殆二百步樓上望卒厲聲嫚罵世宗怒甚命左右射之遠莫能及仁瑀引滿應弦而顛及淮南平身被數十創賜以良藥遷內殿直都虞候又從平三關恭帝嗣位詔從太祖北伐初以佐命功授散員都指揮使領貴州刺史俄遷鐵騎右廂都指揮使又爲虎捷左廂都

指揮使領扶州團練使縱平澤潞以功領常州防禦使改龍捷左廂都指揮使建隆二年改領岳州防禦使俄又移領漢州初詔仁瑀等領荆湖諸郡不數歲復其地至是將征蜀又詔領川陝諸郡遂平之先是薛居正知貢舉仁瑀私囑所與者榜出無其人聞喜宴日仁瑀酒酣携所囑者詣居正切責之爲御史中丞劉溫叟所劾帝優容之王繼勳以后族驕恣凌蔑將帥人皆引避獨仁瑀詞氣不相下嘗攘臂欲歐之會帝將講武郊外遂欲相圖各勒所部兵私市白挺太祖密知之詔罷講武出仁瑀爲密州防禦使太祖

征晉陽命仁瑀率師巡邊至上谷漁陽契丹素聞仁瑀名不敢出因縱兵大掠俘生口牛羊數萬計駕還仁瑀歸治所明年羣盜起兖州賊首周弼毛襲甚勇悍材貌奇偉弼號曰長脚龍監軍討捕數不利詔仁瑀掩擊仁瑀率帳下十餘卒入泰山擒弼盡獲其黨魯郊遂寧開寶四年遷瀛州防禦使兄子嘗因醉誤殺平民繫獄當死民家自言非有宿憾但過誤爾願以過失殺傷論仁瑀曰我爲長吏而兄子殺人此怙勢爾非過失也豈敢以私親而亂國法哉遂論如律給民家布帛爲棺歛具太平興國初移知遼州四年

車駕征太原命仁瑀與成州刺史慕容超飛龍使白重貴八作使李繼昇分兵攻城及征范陽命仁瑀率禁兵擊契丹於盧龍北契丹兵奔潰師還遷朔州觀察使判瀛州事七年卒年五十贈河西軍節度葬事官給

論曰宋初交廣劔南太原各稱大號荆湖江表祗通貢奉契丹相抗西夏未服太祖常注意於謀帥命李漢超屯關南馬仁瑀守瀛州韓令坤領常州賀惟忠守易州何繼勳領棣州以拒北敵又以郭進控西山武守琪戍晉州李謙溥守隰州李繼勳鎮昭義以禦

太原趙贊屯延州姚內斌守慶州董遵誨屯環州王
彥昇守原州馮繼業鎮靈武以備西夏其族在京師
者撫之甚厚郡中筦榷之利悉以與之恣其貿易免
其所過征稅許其召募亡命以爲爪牙凡軍中事皆
得便宜每來朝必召對命坐厚爲飲食錫賚以遣之
由是邊臣富貲能養死士使爲間諜洞知敵情及其
入侵設伏掩擊多致克捷二十年間無西北之憂以
至命將出師平西蜀拓湖湘下嶺表克江南所向遂
志蓋能推赤心以馭羣下之所致也若李進鄉楊美
亦專師西征而美居北海以樂易結民心誠得爲政
之本延渥承矩守恩允正皆紹先業以勲名著承矩
議屯田贊和好其謀甚遠守恩以果敢死事宋之武
功於斯爲盛焉

列傳卷三十二

列傳卷第三十三

宋史二百七十四

開府僑司在國錄軍國軍事前中書右丞相駁國史領經筵都總裁臣脫脫等奉

勅

王贊 張保續 趙玘 盧懷忠

王繼勳 丁德裕 張延通 梁迴

史珪 田欽祚 侯贊 王文寶

翟守素 王侁 劉審瓊

王贊澶州觀城人少為小吏累遷本州馬步軍都虞候周世宗鎮澶淵每旬決囚贊引律令辨析中理問之知其嘗事學問即署右職及即位補東頭供奉官

累遷右驍衛將軍三司副使時張美爲使世宗問京
城衛兵歲廩幾何美不能對贊代奏甚悉美因是銜
之及征關南言於世宗以贊爲客省使領河北諸州
計度使五代以來姑息藩鎮有司不敢繩以法贊所
至發擿姦伏無所畏忌振舉綱領號爲稱職由是邊
臣切齒師還復爲三司副使建隆初始平李重進太
祖素知贊材幹可委以完葺卽令知揚州旣行舟覆
於閭橋下溺死親屬隨沒者三人上甚嗟悼謂左右
曰溺吾樞密使矣蓋將大用也賻其家絹三百匹米
麥各二百斛

張保續字嗣光京兆萬年人父洪唐左武衛上將軍
保續以蔭補太廟齋郎梁貞明中調補臨濟尉選充
四方館通事舍人後唐天成初領瓜州官告國信副
使郊祀改右贊善大夫晉天福中歷太府光祿二少
卿職同正領通事舍人開運二年契丹入寇杜重威
李守貞符彥卿等率兵禦之命保續馳騎往來軍中
諭機事旣而大破敵於陽城使還以本官充西上閣
門副使明年使荆南復命轉東上閣門副使契丹犯
闕被驅北徙留范陽歲餘逃歸漢乾祐初出爲隴州
防禦使周祖革命召爲東上閣門副使從平慕容彥

超累遷引進副使知閣門事世宗即位授西上閣門使明年進秩東上閣門使從上征淮南會壽州納款遣保續先往慰撫及劉仁贍率將卒出降以功遷判四方館事就遷客省使從平瓦橋關奉使吳越宋初遷衛尉卿判四方館客省閣門事保續性介直好儉素在閣門前後四十年善宣贊辭令聽者傾聳累使藩國不辱命歷事六朝未嘗有過從征李筠以足疾留河內後歸京師建隆二年卒年六十四趙玘澶州人家富於財晉天福中以納粟助邊用補集賢小史調濮州司戶叅軍刺史白重進以其年少

欲試以事因以滯獄授之玘為平決悉能中理重進移刺虢成二州連辟為從事會契丹構難秦帥何重建獻地於蜀孟知祥署高彥儔秦州節度成為支郡因署玘秦成階等州觀察判官周顯德初命王景帥兵討秦鳳彥儔出兵救援未至聞軍敗因潰歸玘閉門不納名官屬諭之曰今中朝兵甲無敵於天下自用師西征戰無不勝蜀中所遣將皆武勇者卒皆驍銳者然殺戮遁逃之外幾無孑遺我輩安忍坐受其禍去危就安當在今日眾皆俯伏聽命玘遂以城歸朝世宗欲命以藩鎮宰相范質不可乃授郢州刺史

歷汝密澤三州刺史建隆中入爲宗正卿乾德初出
爲秦州刺史二年改左監門衛大將軍判三司玘狂
躁悻直多忤上旨太祖頗優容之嘗廉得宰相趙普
私市秦隴大木事潛以奏白然懼普知因稱足疾求
解職五年春罷使守本官自是累獻密疏皆留中不
出常疑普中傷六年詣闕納所授告命詔勒歸私第
又請退居鄆州不許玘不勝忿踰年伺普入朝馬前
揚言其短上聞之名玘及普於便殿面質其事玘大
言詆普敗木規利上怒促令集百官逐普且論其事
王溥等奏玘誣罔大臣普事得解上詰責玘命武士

搃之令御史鞠於殿庭普爲營救得寬其罰黜爲汝
州牙校太平興國三年卒年五十八

盧懷忠瀛州河間人少有膂力善騎射漢乾祐初寓
居河中值李守貞之叛周祖圍其城懷忠夜踰城出
見陳攻取便宜河中平奏補供奉官從征慕容彥超
於兗州顯德初監沂州軍以所部破海州功居多世
宗議北征先遣懷忠按視出師道路三關平遷如京
副使宋初遷內酒坊副使會郎州軍亂太祖將出師
致討遣懷忠使荆南因謂曰江陵人情去就山川向
背我欲盡知之懷忠使還奏曰繼冲甲兵雖整而控

弦不過三萬年穀雖登而民苦暴斂南邇長沙東距金陵西迫巴蜀北奉朝廷觀其刑勢蓋日不暇給矣太祖名宰相范質等謂曰江陵四分五裂之國今出師湖南假道荆湖因而下之萬全策也卽以懷忠爲前軍步軍都監荆湖平以功遷內酒坊使乾德二年改判四方館事知江陵府四年王師伐蜀江陵當峽江會衝以供億之勞遷客省使又明年使江南還中途遇疾肩輿歸京師太祖遣醫丸艾以賜之未幾卒年四十九大中祥符四年錄其子熙爲校書郎王繼勳陝州平陸人隸河中府爲牙校李守貞之叛

令繼勳據潼關爲郭從義所破走還河中俄白文珂劉詞領兵至城下守貞又遣繼勳與其愛將聶知遇夜出攻河西砦復爲漢兵所敗被劊而遁繼勳度守貞必敗遂踰城出降周祖奏補供奉官廣順初領汾州刺史充晉磁隰等州緣邊巡檢歷憲麟石磁四州刺史宋初遷磁州團練使坐境上用兵失律荆罕儒陷陣責授右監門衛率初平荆襄命權知道州未幾授本州刺史州境與廣南接劉鋹屢引兵入寇繼勳因上言嶺表可圖之狀及王師南伐以爲賀州道行營馬步軍都監繼勳有武勇在軍陣常用鐵鞭鐵槊

鐵搃軍中目爲王三鐵

丁德裕洛州臨洛人父審琦彰武軍節度周廣順初以蔭補供奉官宋初歷通事舍人西上閣門副使建隆三年遷東上閣門使從慕容延釗平荆湖以功授引進使又與潘美尹崇珂克郴州遷客省使乾德五年遷內客省使時成都初平群寇大起用爲西川都巡檢使與閣門副使張延通同率師討之擒賊帥康祚礫於市歲餘盡平其黨頗與延通不協歸朝告其陰事延通坐棄市又奏轉運使禮部郎中李鉉嘗醉酒言涉指斥上怒驛召鉉下御史案之鉉言德裕在

蜀日屢以事請求多拒之皆有狀御史以聞太祖悟止坐鉉酒失責授左贊善大夫未幾德裕亦出知潞州會征江南遣德裕爲常州行營兵馬都監領吳越兵助主帥進討常州平命權知州事又改昇州東南路行營都監敗潤州軍五千餘於城下及拔潤州移領常潤等州經略巡檢使德裕以傾險爲衆所惡恃勢剛狠不恤士卒黷貨無厭越人苦之錢俶奏其事貶房州刺史卒

張延通潞州潞城人父彥成周右金吾衛上將軍延通性穎悟有才幹蔭補供奉官宋初歷通事舍人遷

東上閣門副使開寶中為西川兵馬都監太祖以蜀
寇未平命同內客省使丁德裕引進副使王班內臣
張嶼領兵屯蜀部德裕頗專恣延通面質其短德裕
銜之又與張嶼不協延通亦為和斛之德裕疑延通
與嶼為黨益不悅會太祖征太原有使自行在至備
言太祖當盛暑躬冒矢石勞頓萬狀延通曰主上勤
勞苦此而吾輩口享安樂蓋言不自安也德裕不答
會張嶼先歸闕太祖賜予甚厚延通德裕繼至則召
延通顧問而待德裕稍薄德裕頗疑懼遂奏延通嘗
對衆言涉指斥且多不法事指嶼為黨太祖怒即收
延通張嶼及王班下御史臺鞫之延通等引伏太祖
始欲捨之及引問延通抗對不遜遂斬之嶼班并內
臣王仁吉並杖春嶼配流沙門島班許州仁吉西窰
務時開寶二年也

梁迴博州聊城人少為吏部小史周世宗在藩邸日
得給事左右及嗣位補殿直改供奉官四遷至左藏
庫使太祖將討西蜀以迴監秦州戍兵蜀平改監霸
州兵轉宮苑使從征太原還會命蜀州刺史聶章為
沁州兵馬部署以迴監其軍無何并人入寇迴與閻
彥進同率兵擊敗之以功遷東上閣門使開寶五年

命爲廣南道兵馬都監兼諸州巡檢八年奉使江南
迴素貪冒外務矯飾初若嚴毅不可犯雖饋食亦不
受江南人頗憚之旣而奉以貲貨殆直數萬緡迴卽
大喜過望登舟縱酒繼日宴樂及歸戀戀不發人多
笑之暨王師伐金陵命迴與潘美劉遇率步兵先赴
荆南且以迴護行營步兵及左廂戰濯與吳人戰采
石殺獲甚衆江南平以功領順州團練使太宗卽位
判四方館事領禁軍戍澤州太平興國三年錢俶來
朝命往淮泗迎勞夏汴水大決詔迴發畿內丁男三
千護塞汴口四年征太原以迴爲行營前軍馬步軍

都監督軍攻城中流矢四車駕還命與孟玄喆崔翰
率兵屯定州以功遷引進使五年受詔與潘美城并
州於三交及築緣邊保障七年李繼遷寇邊以迴領
兵護銀夏州八年召歸授唐州防禦使令赴職雍熙
二年繼遷誘殺都巡檢使曹光實乘勢數寇邊復召
迴爲銀夏都巡檢使赴邊捍禦之三年夏卒於銀州
官舍年五十九迴性麤率尤不喜文士故事節帥出
鎮及來朝便殿宴勞翰林學士皆預坐開寶中迴爲
閣門使白太祖曰陛下宴犒將帥安用此輩預坐自
是罷之至淳化中翰林學士蘇易簡白於太宗始復

預焉大中祥符八年錄廻子廷翰為奉職

史珪河南洛陽人父暉晉嚴衛指揮使珪少以武勇
隸軍籍周顯德中遷小校太祖領禁衛以珪給事左
右及受禪州為御馬直隊長四遷馬步軍副都軍頭
兼控鶴弓弩大劔都指揮使開寶六年加都軍頭領
毅州刺史太祖初臨御欲周知外事令珪博訪珪兼
得數事白於上驗之皆實由是信之後乃漸肆威福
民有市官物不當價者珪告其欺罔當寘法列肆無
不側目上聞之因下詔曰古人以獄市為寄者蓋知
小民唯利是從不可盡法而繩之也况先甲之令未

嘗申明苟陷人於刑深非理道將禁其二價宜示以
明文自今應市易官物有妄增價直欺罔官錢者案
鞫得實並以枉法論其犯在詔前者一切不問自是
珪不復敢言時德州刺史郭貴知邢州國子監丞梁
夢昇知德州貴族人親吏之在德州者頗為姦利夢
昇以法繩之貴素與珪善遣人以其事告珪圖去夢
昇珪悉記於紙將伺便言之一日上因言爾來中外
所任皆得其人珪遽曰今之文臣亦未必皆善乃探
懷中所記以進曰祗如知德州梁夢昇欺蔑刺史郭
貴幾至於死上曰叶必刺史所為不法夢昇真清強

吏也因以所記紙付中書曰卽以夢昇爲贊善大夫
旣又曰與左贊善珪以讚不行居常怏怏九年坐漏
洩禁中語出爲光州刺史會歲饑淮蔡民流入州境
珪不待聞卽開倉減價以糶所全活甚衆吏民詣闕
請植碑頌德者數百人太平興國初以爲楊楚等九
州都巡檢使四年征太原命珪與彰信軍節度劉遇
攻城北面從征幽州坐所部逗撓失律責授定武行
軍司馬數月召爲右衛將軍領平州刺史督浚惠民
河自尉氏達京九十里數旬而畢民咸便之會江淮
民麴謀百等數十百人聚爲盜命珪率龍猛騎兵五

百往捕悉獲之六年遷隰州刺史知保州靜戎軍上
緣邊便宜十五事皆從之雍熙中從曹彬征幽州爲
押陣部署以所部下涿州師還卒年六十一珪多智
數好以甘言小惠取譽於人故所至不忍其去云

田欽祚潁州汝陰人父令方漢號州團練使帳下伶
人靖邊庭妻有美色令方私之邊庭不勝忿會陝西
二叛連衡關輔間人情大擾邊庭率其徒數人夜縋
入州解害令方因掠郡民投趙思綰至潼關與守關
使者戰遂敗散朝廷錄欽祚爲殿直改供奉官周世
宗征淮南爲前軍都監從征關南還會塞澶淵決河

命欽祚領禁兵護役因令督洽澶州城淮人寇高密
刺史王萬威求濟師命欽祚領州兵援之既至圍解
宋初遷閣門通事舍人乾德二年冬討蜀爲北路先
鋒都監令乘傳往來宣達機事孟昶降奏捷書馳奏
遷西上閣門副使蜀土寇亂又遣欽祚率師討平之
四年春并人寇樂平從羅彥瓌拒之獨以所部三千
人破寇擒副將一人俘獲其衆以功遷西上閣門使
開寶二年又與何繼筠破賊兵牙石嶺關領賀州刺
史判四方館使三年契丹寇中山以欽祚爲定州路
兵馬都部署與戰遂城自旦及晡殺傷甚衆欽祚馬

中流矢踣騎士王超授欽祚以馬軍復振敵解却朝
廷將議討江表遣欽祚覘之還奏合旨江南所得寶
貨直三千萬悉以賜欽祚會興師首命欽祚與曹彬
李漢瓊率騎軍先赴江陵就命爲昇州西南路行營
馬軍兼左廂戰權都監領兵敗吳軍萬餘于溧水斬
其主帥李雄等五人擒裨將二人進圍金陵爲南面
攻城部署既平以功加領汾州防禦使太平興國初
遷引進使爲晉州都鈐轄太原驍將楊業率衆寇洪
洞縣欽祚擊敗之斬首千餘級獲馬數百太宗賜欽
祚白金五千兩令市宅四年從征太原護前鋒騎兵

屯石嶺關以扞契丹欽祚性剛戾負氣多所忤犯與主帥郭進不協進戰功高屢爲欽祚所陵心不能甘遂自縊死初賊兵奄至進出戰欽祚但閉壁自守旣去又不追所受月奉芻粟多販鬻規利爲部下所訴責授睦州團練使車駕北巡以爲幽州西路行營壕砦都監六年秋改房州團練使逾年又改柳州嶺外多瘴氣因遘疾累表乞生還闕下上憐之遷郢州團練使在郡二年入覲欽祚見上涕泣不已以爲銀夏綏宥都巡檢使俄召還會征幽州命欽祚與宣徽南院使郭守文爲排陣使時欽祚已被病受詔不勝喜

一夕卒欽祚性陰狡尤不喜儒士好狎侮同列人多惡之子承誨仕至供奉官閣門祇候承說至崇儀副使

侯贊并州太原人父義漢遼州刺史贊以蔭補殿前承旨周顯德中再遷至供奉官江南復命領三門集津發運事宋初爲諸衛將軍先是朝廷歲仰關中穀麥以給用贊掌其事歷三十年國用無闕累遷至右武衛將軍開寶中歷知建安軍揚徐二州皆有善政太宗即位移知福州改右衛將軍太平興國二年錢俶初納土詔贊馳往兩浙諸州閱視軍儲芻茭累遷

右衛大將軍七年知靈州按視蕃落宴犒以時得邊
士心部內大治遷左衛在朔方凡十餘年上念久次
求可代者而難其人淳化二年卒于官年七十四贈
本衛上將軍

王文寶開封陽武人以任子補殿直太平興國初累
遷至軍器庫使嘗使契丹會陳洪進獻漳泉地以文
寶監泉州兵羣盜大起文寶與轉運使楊克讓知州
喬惟岳共討平之以功領媯州刺史加內弓箭庫使
二年京西轉運使程能議開新河自襄漢至京師引
白河水注焉以通湘潭之漕詔發唐鄧汝潁許蔡陳

鄭丁夫數萬赴其役發諸州兵萬人助之命文寶與
大宅使李繼隆作坊副使李仁祐劉承珪分往護作
既而地高水下不能通卒堙廢焉雍熙四年改東上
閣門使歷知涇延二州會遼人寇通遠軍命文寶率
師致討還遷判四方館事文寶歷內職二十年雅好
言外事太祖太宗頗信任之中外咸畏其口出為高
陽關兵馬鈐轄淳化二年卒于官

翟守素濟州任城人父溥晉左司禦率府率守素以
父任為殿直歷漢周遷供奉官領承天軍使乾德中
為引進副使從王全斌伐蜀以往來馳告軍事為職

蜀平擢判四方館以兩川餘寇未殄慮致騷動再令
守素入蜀經略諸郡分兵以防遏之開寶中會麟府
內屬戎人爭地不決因致擾亂命守素馳往撫喻守
素辨其曲直戎人悅服從征太原命海州刺史孫方
進圍汾州守素監其軍轉引進使開寶三年命爲劔
南十州都巡檢使東上閣門使郭崇信副之賜守素
錢五百萬入謝日復遣爲岐帥符彥卿官告使守素
辭以錫賚優厚不敢更當奉使之詔上不許九年吳
越國王錢俶來朝命守素護諸司供帳迎勞郊外并
壘未下詔與洛州防禦使郭進率兵深入其境蹈藉

禾稼守素多所虜獲太宗卽位遷客省使領憲州刺
史太平興國三年夏河決滎陽詔守素發鄭之丁夫
千五百人與卒千人領護塞之是秋梅山洞蠻恃險
叛命詔遣守素率諸州屯兵往擊之值霖雨彌旬弓
弩解弛不堪用明日將接戰守素一夕令削木如弩
及旦賊奄至交射之賊遂敗乘勝逐北盡平其巢穴
先是數郡大吏富人多與賊帥包漢陽交通旣而得
其書訊數百封守素竝焚之反側以定俄而錢俶獻
浙右之地詔守素爲兩浙諸州兵馬都監安撫諸郡
人心甚悅卽以知杭州歲滿爲西京巡檢使秦王廷

美以事勒歸私第以守素權知河南府兼留守司事
屬洛陽歲旱艱食多盜上憂之守素既至漸以寧息
未幾遷商州團練使雍熙二年改知延州自劉廷讓
敗于君子館河朔諸州城壘多圯四年詔守素與田
仁朗王繼恩郭廷濬分路按行發諸州鎮兵增築護
其役賜白金三十兩留充天雄軍兵馬鈐轄知大名
府改知潞州會建方田命爲代北方田都部署拜州
兵馬鈐轄從屯夏州改知鳳翔府淳化中夏帥趙保
忠上言其弟繼遷誘戎人爲寇宜求援師詔守素率
兵復屯夏州未幾又徙石州以老病上疏求歸本郡

從之三年卒年七十一守素逮事四朝縣歷內職五
十餘年性謹慎寬仁容衆所至有治績凡斷大辟獄
雖罪狀明白仍徧詢僚案僉同而後決屬吏有過不
面折必因公宴援往事之相類者言其獲咎以微警
之新進後生多至節帥而守素义次不遷殊無愾獲
意時論以此多之

王侁字祕權開封浚儀人父朴周樞密使侁以父任
太僕寺丞朴卒世宗幸其第召見諸孤以侁為東頭
供奉官開寶中征江南命侁率師戍桐城王師渡江
與樊若水同知池州領兵敗江南軍四千餘于宣州

金陵平加閣門祗候太平興國初預討梅山洞蠻契丹使來朝詔侁送于境上還使靈州通遠軍及旋言主師所留牙兵率與邊人交結頗桀黠難制歲久當慮請悉代之太宗因遣侁調內郡卒往代之戍者聞代多不願還侁察其中旅拒者斬之以徇衆皆悚息遂將以還一歲中數往來西邊多奏便宜上多聽用遷通事舍人四年從征太原以侁護陽曲塌地石嶺關諸屯賜廐馬介胄五月即城下轉東上閣門副使晉陽平留為嵐憲巡檢九月代還遷西上閣門使賜錢百萬河西三族首領折遇也叛入李繼遷侁帥師

討擒之以功領蔚州刺史王師北征命為并州駐泊都監又為雲應等州兵馬都監侁性剛愎以語激楊業業因力戰陷於陣侁坐除名配隸金州事載楊業傳會赦移均州團練副使淳化五年召還道病至京師卒弟僕供奉官閣門祗候坐征交趾軍敗誅備偃並進士及第偃至太常博士朴弟格宋初為右補闕直史館至都官員外郎廣南轉運使格子侗太平興國進士至都官員外郎

劉審瓊涿州范陽人家素貧漢乾祐中湘陰公鎮彭問審瓊始隸帳下周祖受命遁去依永興軍節度劉

詞頗委任之詞卒屬太祖節鎮給事左右及受禪補殿直從平澤潞改供奉官開寶中累遷至軍器庫使會樞密使李崇矩門人鄭伸擊登聞鼓誣告崇矩受太原席義叟黃金私結翰林學士扈蒙以甲科私義叟引審瓊爲證上怒召審瓊詰問審瓊具言其誣枉得解遂出知鎮州七年太宗征河東駐蹕月餘儲待無闕遷領擅州刺史知潭州州素多火日調民積水爲防民甚勞之審瓊至悉罷之以爲民便徙知河陽淳化三年受代歸陳衰老乞正受郡符人閱其舊人授坊州刺史至道三年卒于官審瓊嘗給事外諸侯

雅善酒令博鞠年八十餘筋力不衰髭髮鬢黑孫夔進士及第後爲祠部員外郎祕閣校理

論曰王贊奮迹小校有奉公之節繩姦列郡不畏強禦保續單車出使不辱君命懷忠識荆渚之將危繼勲知番禺之可取侯贊久治邊郡文寶數護屯兵斯各一時之效也德裕梁廻欽祚王侁皆練習戎旅頗著勲勞然率彊戾而乏溫克以速於戾斯乃明哲之所戒玆以剛險蒙悔吝珪以發擿肆威福其不逞者歟守素不事躁競審瓊克享期頤易曰視履考祥其旋元吉此之謂也

宋史列傳卷三十三

列傳卷第三十四

宋史二百七十五

開府儀同三司桂國錄軍國重事留書右丞相兼國史領經筵事都總裁臣脫等奉
勅修

劉福

安守忠

孔守正

譚延美

元達

常思德

尹繼倫

薛超

丁罕

郭密

博思讓
李斌附

田仁朗

劉謙

劉福徐州下邳人少儻魁岸有膂力周顯德中世宗征淮南福徒步謁見于壽春世宗奇之因留麾下每出戰則令福率衛士為先鋒與破紫金山砦淮南

平錄功授懷德指揮使宋初遷橫海指揮使率所部
 隸步帥劉光毅由峽路征蜀比至成都孟昶已降大
 將王全斌部送降卒歸京師至綿州降卒盜庫兵劫
 蜀舊將全師雄以叛焚廬舍剽財貨以去刺史成彥
 饒以同華兵百餘人守其城全斌遣米光緒將七百
 騎及福所部以屯護之光緒盡殺師雄妻孥師雄領
 叛卒益聚村民十餘萬衆攻城益急會龍捷指揮使
 田紹斌率精銳百騎由東山西北行福領所部由山
 南行出賊不意夾擊之賊衆大潰斬首及溺江死者
 以萬計以功授虎捷都虞候繼隸曹彬麾下平江南

還授指揮使領蔚州刺史從太宗克并汾遷馬步都
 軍頭武州團練使端拱初出為洛州防禦使二年改
 雄州防禦使兼本州兵馬部署雄州地控邊塞常屯
 重兵福至部按行城壘調鎮兵以給繕完出私錢以
 資宴犒寇雖大至而恃以無恐矣淳化初遷涼州觀
 察使判雄州事二年卒年六十四贈太傅福雖不學
 而御下有方略為政簡易人甚德之領雄州五年郡
 境寧謐福既貴諸子嘗勸起大第福怒曰我受祿厚
 足以僦舍以庇汝曹既無尺寸功以報朝廷豈可營
 度居室為自安計乎卒不許既死上聞其言賜其子

白金五千兩使市第宅

安守忠字信臣并州晉陽人父審琦爲周平盧軍節度封陳王晉天福八年審琦出領山南東道以守忠爲才內指揮使領繡州刺史周顯德四年春改鞍轡庫使會淮南初下命守忠馳往宣諭時藩臣驕蹇遇朝使多簡傲守忠抗以正禮無所辱命未幾改衛州刺史宋初入爲左衛將軍建隆四年湖南初平命爲永州刺史乾德中護河陰屯兵蜀平太祖知遠俗苦苛虐南鄭爲走集之地故特命守忠知興元府以撫綏之四年改漢州刺史時寇難甫平使車旁午公祭

不足守忠出私錢以給用每遣使太祖必戒之曰安守忠在蜀能律已以正汝行見之當效其爲人也開寶初改濮州刺史會河決澶州命守忠副潁州團練使曹翰護役河決遂塞五年知遼州民有陰召并寇謀內應者事泄守忠悉斬以徇九年命將征太原守忠受詔與孫晏宣由遼州入旣而與路羅砦監押馬繼恩遇乃相與會兵入賊境燔砦四十餘獲牛羊數千議將深入會上崩乃班師太平興國初移知靈州在官凡七年雍熙二年改知易州徙夏州每西戎犯邊戰無不捷錄功就拜濮州團練使端拱中知滄州

改瀛州兼高陽關駐泊部署遷瀛州防禦使初守忠嘗夢一濮字方丈餘及領是郡幾二十年於是始寤淳化二年徙知雄州方與僚佐宴飲有軍校謀變擐甲及闔閭者倉卒入白守忠言笑自若徐顧坐客曰此輩酒狂爾擒之可也人服其量焉明年加耀州觀察使兼判雄州未幾召還條陳邊事敷奏稱旨賜錢五百萬五年又知滄州至道初移雄州三年復知滄州拜感德軍節度觀察留後徙宋州兼制置營田使威德兼著吏民不忍其去咸平三年入覲遣還未行暴卒年六十九贈太尉錄其子繼昌爲供備庫副使

堦王世及爲光祿寺丞守忠謹慤淡薄爲治簡靜太祖居藩日素相厚善及受禪後每優任之守忠處之益謙從征太原多與謀略人罕知之者所至藩郡樂施予豐宴犒且喜與士大夫遊從故時論多與之初審琦以愛妾故爲隸人所戕守忠終身不畜妓妾而喜佞佛盖有所懲云

孔守正開封浚儀人幼事後唐明宗子許王從益漢初爲東西班承旨事魏王承訓周世宗征淮南以材勇選爲東班承旨宋初補內殿直兼領驍雄吐渾指揮從劉廷翰平蜀還遷驍雄副指揮使開寶中太祖

宋史列傳卷三十四 四
征太原守正隸何繼筠麾下會契丹遣兵來援晉陽
守正接戰於石嶺關大敗之斬首萬級獲其將王破
得時宋師之陷敵者數百人守正以騎軍馳之盡奪
以還太平與國中累遷日騎東西班指揮使太宗親
征晉陽守正分主城西洞屋領步卒大呼先登繼與
內侍蔡守恩等率騎兵力戰晉軍遂潰從征范陽至
金臺驛詔與劉仁蘊先趨岐溝關時城未下守正夜
起垣度鹿角臨機橋以大軍將至說關使劉禹使降
禹解懸橋守正遂入城撫諭其軍民以城守屬綦廷
朗而已赴行在時契丹兵在涿州東守正與傳潛率

御前東西班分兩陣馳擊之逐北二十餘里降其羽
林兵數百人繼與高懷德劉廷翰合兵追之至桑乾
河契丹自是不敢近塞以勞再遷日騎都指揮使領
濡州刺史端拱初遷龍衛都指揮使領長州團練使
出鎮真定是年秋出爲潁州防禦使未幾太宗以其
練習戎旅特置龍衛神衛四廂都指揮使以授之改
領振州防禦使明年拜殿前都虞候領容州觀察使
一日侍宴北苑上入玄武門守正大醉與王榮論邊
功于駕前忿爭失儀侍臣請以屬吏上弗許翌日俱
詣殿廷請罪上曰朕亦大醉漫不復省遂釋不問俄

命爲定州行營副部署受詔詣保州軍開道遇敵于曹河與戰數合梟首三十餘獲馬五十匹上聞而壯之淳化初擢高陽關副都部署軍中小將有詈其校長者守正械送闕下取裁於上未嘗專決焉明年護浚惠民河塞澶州決河就命知州軍改慎州觀察使還領代州部署連移并代夏綏麟府三鎮與李繼遷戰大橫岡援范廷召出塞破賊于白池至行莊焚掠甚衆改代夏二州部署真宗即位復徙代州咸平初授昌化軍節度觀察留後守正上言四任鴈門邊亭久安願徙東北以自效會夏人入寇改定州行營副

都部署四年移彰德軍留後以風疾妨政改安化軍留後景德初復以不任職代時議防秋北鄙守正猶屢表請行上閱之不許無何卒年六十六贈泰寧軍節度使

譚延美大名朝城人軀幹壯偉少不逞遇羣盜聚謀將行剽劫延美即趨就之及就捕法皆抵死延美以與盜素不相識獲免自後往來澶魏間爲盜于鄉里鄉里患之周世宗鎮澶淵募置帳下即位補殿前散都頭從征淮南以勞遷控鶴軍副指揮使又從克三關時太祖領禁兵留督牙隊建隆元年補控鶴指揮

使稍遷都虞候馬步副都軍頭征湖南與解暉分領
行營戰權都指揮使時汪端寇攻朗州甚急招討慕
容延釗遣延美率兵赴之大敗賊衆擒端以還擢鐵
騎副指揮使領睦州刺史四遷至內殿直都知太平
興國初爲蘄州刺史連徙廬壽濠光州軍巡檢使劇
賊之爲害者悉就捕六年徙知威虜軍雍熙三年舉
兵北伐命延美爲幽州西面行營都監與田重進出
飛狐北俄遇敵延美曰彼恃衆易我宜出其不意先
攻之即麾騎軍直進敵兵將潰大軍繼至遂敗之斬
首五百獲其將大鵬翼以獻以功擢本州防禦使逾

年改亳州出爲鎮州鈐轄端拱元年徙知寧遠軍一
旦契丹兵抵城下延美開門以示之不敢入圍城數
日開門如故民出取芻糧者無異平日契丹卒疑之
遂引去二年進邕州觀察使判亳州兼知代州是時
任邊郡者皆令兼領內地一州處其家屬徙知潞陝
涇州咸平四年以左領軍衛上將軍致仕六年卒年
八十三贈建武軍節度子繼倫至崇儀副使雍虞部
員外郎

元達初名守旻洛州雞澤人身長八尺餘負膂力善
射家業農不任作苦委耒耜慨歎而去之事任俠縱

酒嘗醉見道旁槐樹拔劍斬之樹立斷達私喜曰吾聞李將軍射石虎飲羽今樹爲我斷豈神助歟嘗從少年數十百人欲起爲盜里中老父交戒之乃止時郡以戶籍調役達當送徒闕下行數舍乃悉縱之曰吾觀汝曹亦丈夫也豈樂爲是哉可善自爲計吾亦從此逝矣已而郡遣追捕至則達援弓引滿待之追者不敢近由是亡命山林間爲鄉里患太宗居晉邸時達求見得隸帳下嘗侍太宗習射園亭命之射達射四發不中的已而連中上喜爲更其名曰達及卽位補御龍直隊長雍熙初累遷媯州刺史繼領本州

圍練使時州郡部送亡命者至闕左右諷殺之達奏曰此類竄匿者衆豈能盡殺之哉不如赦之以開其自新之路且以成好生之德上悅因悉原之端拱二年擢侍衛步軍都虞候領幽州刺史歷北面行營都部署由常山鎮入爲京城巡檢淳化四年卒年四十二贈昭化軍節度達雖奮自草野歷職戎署至交士夫能折節盡禮人以是稱之

常思德開封人周顯德初以材勇應募隸天武軍累遷神衛都虞候雍熙初從曹彬征幽州因署牙校尋鎮威虜軍端拱初以弓箭直都虞候領溪州刺史淳

化中李順叛蜀命往夔陝招捕師次達州新寧縣調
近州土兵掩殺賊徒三千餘人于梁山時雷有終領
大軍抵合州境上賊衆二萬來拒思德與尹元裴莊
等合擊之合州遂平賊帥田奉正蘇榮據果州思德
因其遁而追捕之斬首八百果州既定餘賊保渠州
及走廣安梁山乃分兵爲二抵廣安梁山者思德領
之趣渠州者元莊領之合力進討盡殲其黨自是川
峽賴以安靜無復寇患以功真授汝州刺史初曹彬
北征不利至涿州左右皆潰散獨思德以所部護至
易州語人曰旣備戎行則與主帥同死生可也若視

利害以爲去就將何面目以見君父乎太宗嘗聞其
言至是陞辭深加慰勞且諭之曰爲臣以忠實爲本
汝少仕時旣以驍勇自効且能盡心于主將事朕之
日雖久而忠實如一今雖老亦當盡心乃職庶無負
乎朕之委寄也未幾移慶州路副都部署屯邠州咸
平初與李繼隆同部芻糧赴靈州以疾改陳留都監
換左神武大將軍二年卒年六十五

尹繼倫開封浚儀人父勲郢州防禦使嘗內舉繼倫
以爲可用太祖以補殿直權領虎捷指揮預平嶺表
下金陵太宗卽位改供奉官從征太原還遷洛苑使

充北面緣邊都巡檢使端拱中威虜軍糧餽不繼契丹潛議入寇上聞遣李繼隆發鎮定兵萬餘護送輜重數千乘契丹將于越謀知之率精銳數萬騎將邀于路繼倫適領兵巡檄路與寇直其越徑趨大軍過繼倫軍不顧而去繼倫謂其麾下曰寇蔑視我爾彼南出而捷還則乘勝驅我而北不捷亦且洩怒於我將無遺類矣爲今日計但當卷甲銜枚以躡之彼銳氣前趣不虞我之至力戰而勝足以自樹縱死猶不失爲忠義豈可泯然而死爲胡地鬼乎衆皆憤激從命繼倫令軍中秣馬俟夜人持短兵潛躡其後行數

十里至唐州徐河間天未明越去大軍四五里會食訖將戰繼隆方陣于前以待繼倫從後急擊殺其將皮室一人皮室者契丹相也皮室旣擒衆遂驚潰于越方食失箸爲短兵中其臂創甚乘善馬先遁寇兵隨之大潰相蹂踐死者無數餘黨悉引去契丹自是不敢窺邊其平居相戒則曰當避黑面大王以繼倫面黑故也以功領長州刺史仍兼巡檢淳化初著作佐郎孫崇諫自契丹逃歸太宗詢以邊事極言徐河之戰契丹爲之奪氣故每聞繼倫名則倉皇不知所措於是遷繼倫尚食使領長州團練使以勵邊將淳

化五年李繼隆奉詔討夏州以繼倫爲河西兵馬都監未幾以深州團練使領本州駐泊兵馬部署至道二年分遣將帥爲五道以討李繼遷時大將李繼隆由靈環路往逗撓不進上怒急召繼倫至京師授靈慶兵馬副都部署欲以夾輔繼隆也時繼倫已被病強起受詔上素聞其嗜酒以上尊酒賜而遣之卽日乘驛赴行營至慶州卒年五十上聞之嗟悼賻贈加等遣中使護其喪而歸葬焉

薛超遼州平城人少有勇力乾德初應募爲虎捷卒從崔彥進伐蜀平錄功補虞候遷十將太平興國初

四遷至天武指揮使從征太原領遊騎千人備禦鎮定境上以張軍勢及車駕還契丹頻寇鎮定侵掠無已超從大將劉廷翰率兵至徐河賊將領騎十餘出挑戰超躍馬直前連射數人斃敵勢遂却大軍乘之奮擊斬首萬餘級以功加步軍都軍頭遷神衛軍都校領叙州刺史雍熙三年從潘美北征至鴈門西陁路與契丹遇又戰敗之追至寰州斬首五百餘級其將趙彥辛以城降超連被創流血濡甲縷部分軍士自若乘勝抵應州其節度副使艾正以城降還加馬步軍都軍頭淳化初屯鎮州遷天武指揮使領澄州

團練使至道元年卒年五十七

丁罕者潁州人應募補衛士累遷指揮使從劉廷翰戰徐河以奪橋功遷本軍都虞候累遷天武指揮使領獎州團練使淳化二年出為澤州團練使知霸州會河溢壞城壘罕以私錢募築民咸德之五年以容州觀察使領靈環路行營都部署與李繼遷戰斬首俘獲以數萬計至道中率兵從大將李繼隆出青岡峽賊聞先遁追十日程不見而返三年真拜密州觀察使知威虜軍徙貝州咸平二年卒子守德能世其家

趙瑫者貝州清河人由衛士累遷龍衛指揮使亦以徐河戰功加鎮州團練使至兵馬部署至道二年卒于官年七贈歸義軍節度使

郭密貝州經城人軀翰雄偉膂力絕人幼孤隨母適同郡王乙因冒姓王氏以知瀛州馬仁瑀薦隸晉王帳下給事左右太宗即位補指揮使復姓郭氏至淳化間凡八遷移貝州駐泊兵馬部署會夏人寇邊以密有武略擢領安州觀察使充靈州兵馬都部署訓練士卒號令嚴肅夏人畏服邊境賴以寧謐至道二年卒年五十八贈保順軍節度傅思讓者冀州信都人少無賴有勇力善騎射太宗居晉

即補親事都校即位補衛士直長累遷至平州刺使奉詔
破契丹兵于唐興口端拱中四遷為容州觀察使知莫州
移隴州上命殿中丞林特同判州事以夾輔之以思讓所
為多不法故也至道二年卒年七十四贈保順軍節度
李斌者青州人太宗在晉即聞其狀貌魁偉召置左右即
位補御龍直副指揮使太平興國中以天武指揮使領鄭
州刺史七年坐嘗受秦王廷美饋遺貶曹州都校雍熙三
年遷營州刺史四年領溪州團練使連為貝冀二州駐泊
都監淳化中繼領萊州洛州團練使勤於政理人服其清
慎轉運使陳繡以狀聞於朝至道初拜桂州觀察使仍判

洛州徙滄州及代吏民不忍其去鄰境亦上其善狀
詔書褒美之咸平三年卒年六十一

田仁朗大名元城人父武仕晉昭義軍節度使仁朗
以父任西頭供奉官太祖即位從討李重進攻城有
功還與右神武統軍陳承昭浚五丈河以通漕運乾
德中討蜀命仁朗為鳳州路壕砦都監伐木除道大
軍以濟錄功遷染院副使太祖征太原與陳承昭壅
汾水灌城城將陷會班師俄遷內染院使數日改左
藏庫使為中官所讒太祖怒立召詰之至殿門命去
冠帶仁朗神色不撓從容曰臣嘗從破蜀秋毫無犯

陸下固知之今主藏禁中豈復為姦利以自汙太祖
怒釋上停其職開寶六年起為權易使七年以西北
邊內侵選知慶州仁朗至率麾下往擊之短兵將接
前鋒稍却仁朗斬指揮使二人軍中震恐爭乞効命
遂大破之其酋長相率請和仁朗烹牛置酒與之約
誓邊境乃寧璽書褒美太平興國初秦州羗為寇命
仁朗屯兵清水會李飛雄事敗召為西上閤門使四
年征太原命仁朗與閤門祗候劉緒按行太原城四
面壕砦閱視攻城梯衝器械太原平留仁朗為兵馬
鈐轄開廐使武再興軍器庫副使賈湜並為巡檢俄

命仁朗與再興役民築榆次新城從幸大名又命為
滄州鈐轄俄遷東上閤門使知秦州九年判四方館
事會議東封命仁朗自京抵泰山督役治道李繼遷
為亂命仁朗率兵巡銀夏歲餘召還未幾繼遷攻麟
州誘殺曹光實遂圍三族砦命仁朗與閤門使王侁
副使董愿宮苑使李繼隆馳傳發邊兵數千擊之仁
朗次綏州奏請益兵留月餘俟報會三族砦將折遇
也殺監軍使者與繼遷合太宗聞之大怒亟遣軍器
庫使劉文裕自三交乘疾置代仁朗繼遷乘急攻撫
寧砦仁朗不知為文裕所代喜謂諸將曰敵人逐水

草散保巖險常烏合爲寇勝則進敗則走無以窮其
巢穴今繼遷嘯聚羌戎數萬盡銳以攻孤壘撫寧小
而固兵少而精未可以旬浹破當留信宿俟其困以
大兵臨之分強弩三百邀其歸路必成擒矣仁朗部
署已定欲示閑暇日縱其樗博不恤軍事上知之遣
使召仁朗赴闕下御史按問仁朗請益兵及陷三族
狀仁朗對曰所召銀綏夏兵其州皆留防城不遣所
部有千餘人皆曹光實舊卒噐甲不完故請益兵况
轉輸芻粟未備三族砦與綏相去道遠非元詔所救
昨臣已定擒繼遷策會詔代臣其謀不果因言繼遷

得部落情願降優詔懷來之或以厚利啗諸酋長密
圖之不爾恐他日難制大爲邊患御史以其狀聞上
大怒切責憲府官吏曰仁朗不恤軍政得爲過乎大
理遂當仁朗乏軍興及征人違期二十日以上坐死
上特貸之下詔責授商州團練副使馳驛發遣是役
也仁朗計已決爲王侁等所構逗撓不進軍故及於
貶後數月上知其無罪召拜右神武軍大將軍部修
河北東路諸州城池數月而就留知雄州加領澄州
刺史時河北用兵大藩多用節將朝議以通判權位
不倫選諸司使有吏幹者佐之以仁朗知定州節度

副使事俄召赴闕未聞命而卒年六十時端拱二年也仁朗性沉厚有謀略頗涉書傳所至有善政雅好音律尤臻其妙時內職中咸以仁朗爲稱首故死之日人多惜之

劉謙博州堂邑人曾祖直以純厚聞于鄉黨里有盜其衣者置不問州將廉知俾人故竊其衣亦不訴理卽召詰前盜衣者俾還之直給云衣乃自以遺少年非竊也州將義之賜以金帛不受而去父仁罕輕俠自任五代末寇盜充斥仁罕率衆斷澶州浮橋以潰賊因誘獲數十人出芻粟給官軍補內黃鎮將嘗因

事至酒家遇羣寇暴集以計悉梟其首攜詣西京留守向拱補汜水鎮將俄爲散都頭宋初遷許州龍衛副指揮使會王師征廣南爲前鋒還改同州都校卒謙少感槩不拘小節初詣嶺表省父仁罕資以金帛令北歸行商還堂邑舊墅嘗爲鄉里惡少所辱謙不勝怒毆殺之亡命京師遂應募從軍補衛士稍遷內殿直都知至道初真宗升儲邸增補宮衛太宗御使坐親選諸校授謙西頭供奉官東宮親衛都知賜袍笏鞞帶器弊真宗卽位擢授洛苑使謙起行伍不樂禁職求換秩改殿前左班指揮使給諸司使奉料咸

平初遷御前忠佐馬步軍都軍頭領勤州刺史加殿
前右班都虞候上幸大名至北苑屬謙有疾遣歸將
護謙懇請從行既備其二子隨侍仍挾尚醫以從御
厨調膳以給之疾瘳毀所服鞍勒以遺中使上聞賜
白金二百兩駕還改捧日左廂都指揮使領本州團
練使四年遷捧日天武四廂都指揮使領本州防禦
使權殿前都虞候時高翰爲天武左廂都校有卒負
債殺人瘞戶翰營中累日發土得之上怒翰失檢察
執見于便殿謙卽前奏翰職在巡邏及閱教諸軍不
時在營本營事宜責之軍頭上爲釋翰罪景德初加

侍衛馬軍都虞候改領潯州防禦使俄權部軍都指
揮使明年冬制授殿前副都指揮使振武軍節度先
是謙久權殿前都虞候俄權曹璨正授謙頗形慨嘆
至是璨副馬軍而升謙領禁衛焉江北屯兵常以八
月給冬衣謙上言邊城早寒請給以六月後以爲例
無何以足疾求典郡上召見敦勉之大中祥符初從
東封上升太山詔都總山下馬步諸軍與西京左藏
庫副使趙守倫閱視山門設施有法著籍者乃得上
焉禮成進授都指揮使移領保靜軍節度明年八月
卒年六十贈侍中初謙將應募與同軍王仁德訊於

日者日者指謙謂仁德曰爾當爲此人廐吏及謙帥
殿前仁德果隸役廐中子懷懿後爲東染院副使懷
詮內殿崇班閣門祗候

論曰宋初諸將率奮白草野出身戎行雖盜賊無賴
亦廁其間與屠狗販繒者何以異哉及見於用皆能
卓卓自樹由御之得其道也劉福御下有方略所至
著績受祿雖厚而不爲燕安之謀可謂國爾忘家者
矣守忠練達邊事裊身謙慎弭卒校之變於談笑之
頃非善於行權者不能也仁朗沈毅有謀累從征討
綏州之役不惟無功而反坐逗撓豈其計之不善哉

特爲讒邪所構爾自餘諸子皆積戰功以取通侯若
延美之開門示敵思德之翼衛主帥繼倫之襲擊契
丹薛超之累劄赴戰北運之請赦亡命郭密之訓撫
士卒斯皆忠義仁勇有足稱者罕瑄思讓若斌若謙
雖乏奇功而亦克共乃職能寡過者也守正素練戎
旅累任邊要而矜勞肆忿視於勞謙之君子能無愧
乎

列傳卷第二十四

列傳卷第三十五

宋史二百七十六

開府儀同三司柱國錄軍國重事監書省丞相兼修國史領經筵事都總裁良脫等奉勅修

劉保勳

滕中正

劉璠

孔承恭

宋璠

袁廓

樊知古

郭載附

臧丙

徐休復

張觀

陳從信

張平

子從吉

王繼升

子昭遠

尹憲

王賓

安忠

劉保勳字脩業河南人父處讓仕後唐入晉拜樞密

使出爲彰德軍節度保勲少好騎射後唐清泰中裁
十許歲攝潞州左司馬隨父署彰德軍衙內都校父
卒補供奉官習刑名之學頗工詩因獻詩宰相桑維
翰奇之奏擢爲太常丞歷漢爲秘書丞周廣順初有
薦其詳練法律兼大理正遷工部員外郎歷掌鄆宋
楚三州鹽麴商稅宋初拜戶部遭母喪起復出掌蘄
口權茶徙雲安監鹽制置使歲滿出羨餘百萬轉運
使欲以狀聞保勲曰貪官物爲已功可乎乃止開寶
初遷司封員外郎監左藏庫六年知宋州太平興國
初遷祠部郎中通判晉州二年選爲江南西路轉運

使賜錢百萬三年徙兩浙東北路太宗征晉陽改戶
部郎中爲隨軍轉運使兼勾當北面轉運事又與候
陟同勾當軍前諸事會陝西北路轉運使雷德驤調
發沁州軍糧後期詔劾德驤以保勲代之太原平命
知并州逾年召入判大理寺出知昇州是冬召歸點
檢三司開折司會鹽鐵使闕又命權領其事遷兵部
郎中兼判三司勾院八年拜右諫議大夫俄知開封
府寡婦劉詣府訴夫王前妻子元吉寘葶食中毒已
將死按驗獄成元吉妻搃登聞鼓訴寃事下御史臺
其實劉有姦狀元吉知之劉慙悸成疾故誣告之保

勲坐奪奉三月俄以辛仲甫代之未幾復判大理寺
雍熙二年權御史中丞兼勾當差遣院是秋罷權中
丞三年春命曹彬等征幽州保勲以本官知幽州行
府事子利涉以開封府兵曹督芻粟隨軍常從其父
會王師不利濟巨馬河更相蹂躪多死保勲馬陷淖
中利涉自後撤出之力不勝人馬相擠壓遂俱死時
年六十二上命恤其後保勲三子二子先保勲死季
子隨沒以其孫巨川為嗣授祕書正字端拱初特召
贈工部侍郎保勲性純謹少寐未嘗忤物精於吏事
不憚繁劇嘗語人曰吾受君命未嘗辭避接同僚未

嘗失意居家積貲未嘗至千錢及死聞者皆痛惜之
至道二年又錄其次孫世長為正字咸平初保勲妻
卒詔賜錢十萬巨川累為比部郎中

滕中正字普光青州北海人曾祖瑤高郵令祖煦即
墨令父保裔興平令中正弱冠舉進士不第周顯德
中滑帥向拱奏辟為掌書記拱移鎮彭門會中正丁
外艱復表奪情仍署舊職加朝散大夫拱鎮襄陽以
中正為襄均房復觀察判官及留守西路又奏署河
南府判官檢校戶部員外郎乾德五年度支員外郎
侯陟表中正有材幹入為殿中侍御史兩川平選知

興元府判西京留臺俄通判河南府留守司事太祖
雩祀西洛以祗事之勤轉倉部員外郎太宗即位遷
考功員外郎授四川東路轉運使太平興國五年召
爲膳部郎中兼侍御史知雜事六年命與中書舍人
鄭贄戶部郎中雷德驤同知京朝官考課中正嘗薦
舉監察御史張白知蔡州假貸官錢二百貫糴粟麥
以射利坐棄市中正降爲本曹員外郎依舊知雜未
幾又擢拜右諫議大夫權御史中丞雍熙元年春大
宴上歡甚以虛盞示羣臣宰相言飲酒過度恐有失
儀之責上顧謂中正曰今君臣相遇有失者勿彈劾

也因是伶官盛言宴會之樂上曰朕樂在時平民安
是冬乾明節群臣上壽酒既三行上目中正曰三爵
之飲實惟常禮朕欲與群臣更舉一卮可乎中正曰
陛下聖恩甚厚臣敢不奉詔殿上皆稱萬歲二年以
年老辭出知河南府未幾被病罷分司西京淳化初
判留司御史臺命其子玄錫權河南司錄以便養二
年卒年八十四中正性峻刻連鞠大獄時議以爲深
文權中丞甘振舉綱憲人以稱職許之二子並舉進
士玄錫至刑部郎中玄晏後名世寧至工部郎中
劉蟠字士龍濱州渤海人漢乾祐二年舉進士解褐

益都主簿宋初歷安遠軍及河陽節度推官保義軍
掌書記乾德五年召拜監察御史典染院事初蘇曉
掌京城市征頗幹集及卒選蟠代之冬命爲太宗生
辰使開寶七年與殿中丞劉德言同知淮南諸州轉
運事太平興國初就遷倉部員外郎改轉運使歲漕
江東米四百萬斛以給京師頗爲稱職秩滿部內僧
道乞留詔許再任賜金紫改駕部員外郎八年丁內
艱時以諸州綱運留滯起復知京城陸路發運司事
會河決韓村大發丁夫塞之命蟠調給其餉未幾河
塞朝廷方議封禪以蟠爲東封水陸計度轉運使會

詔罷其禮俄遷工部郎中充河北水路轉運使改刑
部郎中就充水陸轉運使入判本部事籍田畢遷左
諫議大夫淳化初兼同考京朝官差遣二年暴中風
眩上遣太醫視之賜以金丹卒年七十三賜錢十萬
給其喪事蟠性清介寡合能攻苦食淡專事苛刻好
設竒詐以售知人主典染作日太祖多臨視之蟠偵
車駕至輒衣短後衣芒屨持挺以督役頭蓬不治遽
出迎謁太祖以爲勤事賜錢二十萬嘗受詔巡茶淮
南部民私販者衆蟠乘羸馬僞稱商人抵民家求市
茶民家不疑出與之即擒寘于法子錯初以父蔭爲

大理評事咸平二年擢進士第嘗獻幸太學頌真宗中夜觀書得錯頌頗嘉賞之出以示輔臣且言錯幼孤能自立召試命直史館累遷至戶部郎中鹽鐵副使

孔承恭字光祖京兆萬年人唐昭宗東遷舉族隨之遂占籍河南五世祖戡唐書有傳戡孫迥萊州刺史迥子昌庶虞部郎中昌庶子莊仕晉爲右諫議大夫由戡至莊皆登進士第承恭莊之子也以門蔭授祕書省正字歷溫安豐二縣主部時王審琦節制壽春以承恭名家子奏攝節度周官府罷調補鄭州錄事

叅軍入爲大理寺丞獻宮詞託意求進太祖怒其引喻非宜免所居官放歸田里太宗即位以赦復授舊官時初榷酒以承恭監西京酒麴歲增課六千萬遷大理正議獄平允擢庫部員外郎判大理少卿事遷屯田兵部二郎中同考校京朝官課第端拱三年下詔曰九寺三監國之羽儀制度聲名徃徃而在各有副貳率其司存品秩素高職任尤重郎吏遷授斯爲舊章比聞縉紳之流頗以臺閣自許目爲散地甚無謂焉朕將振之自我而始其以兵部郎中孔承恭爲太常少卿魏羽爲祕書少監戶部郎中柴成務爲光

宋史列傳卷三十五
六
祿少卿魏庠爲衛尉少卿張洎爲太僕少卿呂端爲
大理少卿臧丙爲司農少卿袁廓爲鴻臚少卿工部
郎中張雍爲太府少卿又以屯田郎中雷有終爲少
府少監虞部郎中索湘爲將作少監時裴祚慎從吉
宋雄先爲少卿皆改授東宮官又詔承恭與左散騎
常侍徐鉉刊正道書俄以疾求解官且言早遊嵩少
間樂其風土願卜居焉上召見哀其羸瘠出御藥賜
之授將作監致仕以其子玠同學究出身爲登封縣
尉俾就祿養未果行而卒年六十二承恭少踈縱及
長能折節自勵嘗上疏請令州縣長吏詢訪耆老求
知民間疾苦吏治得失及舉令文賤避貴少避長輕
避重去避來請詔京邑并諸州於要害處設木牌刻
其字違者論如律上皆爲行之尤奉佛多蔬食所得
奉祿太半以飯僧嘗勸上不殺人又請於征戰地脩
寺及普度僧尼人多言其迂闊云

宋璫字寶臣華州渭南人父鸞監察御史璫乾德中
進士及第拔萃登科解褐青城主簿好寫書秩滿載
數千卷以歸吳廷祚鎮永興辟掌書奏廷祚卒復調
下邳主簿權著作佐郎知綿州太宗即位改右贊善
大夫爲峽路轉運副使代還召對賜緋魚復出知秦

州有善政就拜監察御史充陝西轉運使以章亶代
知秦州璫去州未百日亶坐事繫獄上以璫前有治
績賜錢五十萬再命知秦州安集諸戎部內清肅雍
熙初轉比部員外郎在任凡六年召歸面賜金紫授
度支判官俄遷屯田郎中知益州屬歲饑多盜璫始
至以方略擒捕招輯盜皆首伏屏息下詔嘉獎端拱
初就拜右諫議大夫時兩川轉運使副皆坐事免以
璫爲西川轉運使加左諫議大夫改知陝州淳化中
三吳歲饑疾病民多死擇長吏養治之命璫知蘇州
璫體豐碩素病足至州地卑濕疾益甚人或勸其謝

疾北歸璫曰天子以民病俾我綏撫我以身病而辭
焉非臣子之義也旣而太白犯南斗曰斗爲吳分民
方飢天象如此長吏得無咎乎四年卒年六十一上
聞之嗟悼錄其子明遠爲蒲城主簿俾護其喪歸葬
焉璫性清簡歷官三十年未嘗問家事唯聚書以貽
子孫且曰使不忘本也明遠淳化三年進士後爲都
官員外郎次子柔遠亦舉進士及第垂遠閣門祗候
袁廓劔州梓潼人在蜀舉進士及第入宋補雙流縣
主簿又爲西平縣主簿勾稽漏籍得民丁萬餘州將
薦其勤職就遷上蔡令又以課最擢太子右贊善大

夫令於御史府分領推事掌權貨務廓性夸誕敢大言好詆訐太祖以竒士待之太宗即位遷殿中丞出知楚州歸掌京師市征歲中增課數萬緡上嘉之賜緋魚資錢百萬會錢俶盡籍土宇以獻命廓按籍浙中諸州軍倉庫之物悉輸京師得以便宜從事仍詔每公宴別席而坐以寵異之復命知鄆州會河決溢入城浸居人廬舍至冬月結爲冰廓大發民鑿取用竹輿舁出城散積之使者至謂其有略致水不入城乃以狀聞拜監察御史至春凍解州地下流漸溢入爲民患會秦王廷美遷置房州以崇儀副使閻彥進

知州事廓通判州事並賜白金三百兩廓俄轉殿中侍御史召爲戶部判官命與陳恕李惟清專計度芻糧事改戶部員外郎又爲度支判官籍田轉本曹郎中判戶部勾院廓強項好爭數與判使等較曲直於上前聲氣俱厲上每優容之然勾稽精密由是部領擁積爲郡吏所訴詔御史辨問廓謁見宰相趙普自理屬鄭州團練使侯莫陳利用得罪廓嘗與利用書札往還稔昵普謂之曰職司常事此不足云與利用交結欵密於理可乎廓驚慙泣下不能對數日出知温州就遷鴻臚少卿同郡袁仁甫掌州之關征素以

宗盟之分頗相親善一旦不協互有論奏上遣光祿寺丞牛韶往按驗韶至並攝繫獄置對上疑廓被誣驛召赴闕廓性剛褊被詰治峻急詔書未至以憤死上聞甚追悼之復驗仁甫所誑多無實狀免韶官貶仁甫商州長史贈廓右諫議大夫錄其子丘賀爲奉禮郎始十歲上猶念廓不已又詔削仁甫名籍配隸商州

樊知古字仲師其先京兆長安人曾祖偁濮州司戶參軍祖知諭事吳爲金壇令父潛事李景任漢陽石埭二縣令因家池州知古嘗舉進士不第遂謀北歸

廼漁釣采石江上數月乘小舟載絲繩維南岸疾棹抵北岸以度江之廣狹開寶三年詣闕上書言江南可取狀以求進用太祖令送學士院賜試本科及第解褐舒州軍事推官嘗啓於上言老母親屬數十口在江南恐爲李煜所害願迎至治所卽詔煜令遣之煜方聞命卽厚給齎裝護送至境上七年召拜太子右贊善大夫會王師征江表知古爲鄉導下池州八年以知古領州事先是州民保險爲寇知古擊之連拔二砦擒其魁以獻餘皆潰散方議南征命高品石全振往湖南造黃黑龍船以大艦載巨竹絙自荆南

而下遣八作使郭守濬等率丁匠營之議者以謂江
濤險壯恐不能就乃於石碑口試造之移至采石三
日橋成不差尺寸從知古之請也金陵平擢拜侍御
史令乘傳按行江南諸州詢訪利民復命知江東南
路轉運事數日改授江南轉運使賜錢一百萬先是
江南諸州官市茶十分之八復征其餘分然後給符
聽其所往商人苦之知古請蠲其稅仍差增所市之
直以便於民江南舊用鐵錢十當銅錢之一物價翔
踴民不便知古亦奏罷之先是李煜用兵權宜調歛
知古悉奏爲常額豫章洪氏嘗掌昇州權酷逋鐵錢

數百萬至是知古挾微時常辱於洪氏責償銅錢以
快意太宗卽位授庫部員外郎召歸換金紫賜錢百
萬命爲京西北路轉運使太平興國六年加虞部郎
中就改知邠州移鳳翔府入爲鹽鐵判官出領荆湖
轉運使雍熙初遷比部郎中會河朔用兵分諸郡爲
兩路以給曹輓遷知古爲東路轉運使遷駕部郎中
賜錢五十萬知古本名若水字叔清因召見上問之
曰卿名出何書對曰唐尚書右丞倪若水亮直臣竊
慕之上笑曰可改名知古知古頓首奉詔倪若水實
名若水知古學淺妄引以對人皆笑之端拱初遷右

諫議大夫河北東西路轉運使賜白金千兩兩路各
置轉運副使都轉運使之名自知古始二年詔加河
北西路招置營田使奏請修城木五百餘萬牛革三
百萬上曰萬里長城豈在於此自古匈奴黃河互爲
中國之患朕自卽位以來或疆場無事則有修築
隄之役近者邊烽稍警則黃河安流無害此蓋天意
更迭垂戒常令惕厲然而預備不虞古之善教深溝
高壘亦王公設險之義也所請過當不亦重困吾民
乎乃詔有司量以官物給之會度支使李惟清上言
河北軍儲無備請發河南十七軍州轉粟以赴太宗

曰農事方殷豈可更興此役惟清固以爲請上遣左
正言馮拯乘傳與知古計之知古卽言河北軍儲可
以均濟足俟農隙令民轉餉拯復命太宗曰不細籌
之則民果受弊矣未幾入朝奏事稱旨拜給事中俄
爲戶部使知古有才力累任轉運使甚得時譽及在
戶部頻以職事不治詔書切責名益減素與陳恕親
善恕時參知政事太宗言及計司事有乖違者恕具
以告後因奏事知古遂自解上問從何得知曰陳恕
告臣上怒恕泄禁中語且嫉知古輕佻故兩罷之出
知古知梓州未至改西川轉運使知古自以嘗任三

司使一日掌漕運劍外鬱鬱不得志常稱足疾未嘗
按行郡縣蜀中富饒羅紈錦綺等物甲天下言事者
競商權功利又土狹民稠耕種不足給繇是兼并者
益糴賤販貴以規利淳化中青城縣民王小波聚徒
爲亂謂其衆曰吾疾貧富不均今爲汝輩均之附者
益衆遂攻陷青城縣掠彭山殺其令齊元振巡檢使
張玘與鬪于江源縣射小波中其額旋病創死玘亦
被殺衆遂推小波妻弟李順爲帥初小波黨與裁百
人州縣失於備禦故所在蠶起至萬餘人攻蜀州殺
監軍王亮及官吏十餘人陷邛州害知州桑保紳通

判王從式及諸僚吏逐都巡檢使郭允能允能率麾
下與戰新津江口爲賊所殺同巡檢殿直毛儼徒步
以身免賊勢益張衆至數萬人陷永康軍雙流新津
溫江郫縣縱火大掠留其黨守之往攻成都燒西郭
門不利引去陷漢州彭州旋陷成都時已詔知梓州
右諫議大夫張雍代知古爲轉運使雍未至知古與
知府郭載及屬官走東川詔復令掌兩川漕運知古
具伏擅離所部制置無狀上特宥之以本官出知均
州視事旬日憂悸卒年五十二上猶嗟憫賜其子漢
公同學究出身知古明俊有吏幹辭辨捷給及任西

川不能弭盜而逃雖獲宥終以慙死云

郭載字咸熙開封浚儀人父暉右監門衛將軍義州刺史載蔭爲右班殿直累遷供奉官閤門祇候雍熙初提舉西川兵馬捕盜事太宗賜鞍馬器械銀錢以遣之四年以積勞加崇儀副使召還上言川峽富人俗多贅壻死則與其子均分其財故貧者多詔禁之端拱二年擢引進副使知天雄軍入同勾當三班出知秦州兼沿邊都巡檢使先是巡邊者多領兵騎以威戎人所至頗煩苦之載悉減去戎人感悅遷西上閤門使改知成都府載在天雄軍屢奏市糴朝臣段

獻可馮侃等所市麤惡軍人皆曰此物安可充食太宗頗疑使覆驗之及報與載奏同獻可等皆坐削官仍令填償及載受代獻可等所市皆支畢復有羨數三司判勾馮拯以聞太宗召度支使魏羽詰之羽曰獻可等所市不至麤惡亦無欠數臣與侃親舊是以未敢白太宗曰此公事爾何用畏避因召宰相謂曰此乃郭載力奏朕累與卿等議皆云有實今支畢頗有羨餘軍士復無詞訢郭載朕向以純誠待之何爲矯誣及此然已委西川候還日別當詰責於是獻可等悉復官載行至梓州時李順已構亂有日者潛告

載曰益州必陷公往當受禍少留數日可免載怒曰
吾受詔領方面貼危之際豈敢遷延邪即日入成都
順兵攻城益急不能拒守乃與樊知古率僚屬斬關
出以餘衆由梓州趨劔門隨招安使王繼恩統兵討
順平之復入成都月餘憂患成病卒年四十載前在
蜀頗能為民除害故蜀民悅之再至城都即值兵亂
及隨繼恩平賊亦有所全濟故其死也成都人多歎
惜之

臧丙字夢壽大名人弱冠好學太平興國初舉進士
解褐大理評事通判大寧監官課民煮井為鹽丙職

兼總其事先是官給錢市薪吏多侵牟致歲課不充
坐械繫者常數十百人丙至召井戶面付以錢既而
市薪山積歲鹽致有羨數太宗平晉陽以丙為右贊
善大夫知遼州丙素剛果有吏幹會同年生馮汝士
以祕書丞知石州與監軍不協一夕剗刃於腹而死
事可疑丙上疏言汝士死非自殺乞按治上覽奏驚
駭卽遣使鞠之名丙問狀丙曰汝士居牧守之任不
聞有私罪而言自殺若使冤死不明不加宿直者以
罪今後書生不能治邊郡矣上嘉其直改著作郎俄
遷右拾遺直史館加工部員外郎充河東轉運使俄

兼本路營田使代歸授戶部郎中同知審官院朝廷
方以九等亞列爲重改司農少卿淳化二年拜右諫
議大夫出知江陵府歲餘疾上聞之遣中使及尚醫
馳往視之踰月卒年五十三上軫悼之以其子待用
爲四門助教丙舊名愚字仲回旣孤常夢其父名丙
偶立於庭向空指曰老人星見矣丙仰視之黃明潤
大因望而拜旣寤私喜曰吉祥也以壽星出丙入丁
乃改名焉至是無驗丙於禮不當更名古人戒數占
夢無妄喜也待用歷金部郎中東染院使賀州刺史
次子列進士及第至太常丞

徐休復字廣初濮州鄆城人太平興國初舉進士解
褐大理評事通判轉運使薦其材代歸授太子右贊
善大夫改著作郎直史館賜緋魚遷左拾遺六年加
右補闕充兩浙東北路轉運副使移知明州七年秋
被召赴闕明年授庫部員外郎知制誥九年出知廣
州是歲加水部郎中雍熙二年就遷比部郎中充樞
密直學士賜金紫依舊知州事休復與轉運使王延
範不協乃奏延範私養術士厚待過客撫部下吏有
恩發書與故人韋務昇作隱語偵朝廷事反狀已具
詔遣內侍閻承翰與休復同按劾之遂抵於法端拱

初加左諫議大夫召爲戶部使淳化元年罷使遷給事中連知青路二州休復先上言以父母藁葬青社願得領州事因營丘壠至青州踰年但聚財殖貨終不言葬事至潞州數月瘍生於腦旣而疾甚若見王延範休復但號呼稱死罪後數日卒年五十三休復無他能掌誥命甚不稱職履行不見稱於搢紳云
張觀字仲賓常州毗陵人在江南登進士第歸宋爲彭原主簿太平興國初移興元府掾復舉進士不第調鷄澤主簿再求試特授忠武掌書記就改觀察判官上請復刺史及不遣武德卒詣外州偵事頗稱旨

召拜監察御史充桂陽監使獻所業文賜進士及第會三司言劔外賦稅輕詔觀乘傳按行諸州因令稍增之觀上疏言遠民不宜輕動撓因而撫之猶慮其失所况增賦以擾之乎設使積粟流衍用輸京師愈煩漕輓之力固不可也或以分兵就食亦非安存之策徒斂怨於民未見國家之利太宗深以爲然因留不遣其後復上疏曰臣憑籍光寵備位風憲每遇百官起居日分立于庭司察不如儀者舉之因見陛下天慈優容多與近臣論政德音往復頗亦煩勞至於有司職官承意將順簿書叢脞咸以上聞豈徒褻黷

至尊實亦輕紊國體况帝王之道言則左史書之動則右史書之列于絀素垂爲軌範不可不慎也若夫方今之急者遠人未服邊鄙不寧陰陽未序倉廩猶虛淳朴未還奢風尚熾縣道未治逋逃尚多刑法未措禁令猶密墜典未復封祀猶闕凡此數者皆朝廷之急務也誠願陛下聽斷之暇宴息之餘體貌大臣以之揚摧使沃心造膝極意論思則治體化源何所不至臣又嘗讀唐史見貞觀初始置崇文館命學士者儒更直互進聽朝之際則入內殿講論文義商榷時政或日旰忘倦或宵分始罷書諸信史垂爲不朽

况陛下左右前後皆端士偉人伏望釋循常之務養浩然之氣深詔近臣闡揚玄風上爲祖宗播無疆之休下爲子孫建不拔之業與夫較量金穀剖折毫釐以有限之光陰役無涯之細務者安可同年而語哉上覽而稱之召賜緋魚以爲度支判官歲餘遷左司改鹽鐵判官嘗因奏事白上曰陛下務敦淳化殿宇采飾皆徹去之惟尚朴素天下幸甚然於服御器用臣願亦從純儉上曰朕庶事簡約至於所服多用絀絹皆經澣濯爾卿言甚善觀頰首謝觀數在省署及長春殿次中諮事於其使李惟清辨論牴牾失禮容

惟清不能甘因奏解其任觀抗章論列上亦察其無失故未幾復授舊職又諫罷治佛寺不報俄出為諸路茶鹽制置副使上疏言更茶鹽之制於理非便不合旨改知黃州遷揚州皆有善政會三司改舊貫均州縣之籍以分其職召為三司河東道判官有詔計司官屬不得越局言他事觀自以任諫官乃上書指陳拾遺補闕之職言事固當然不奉詔上怒謂宰相曰朕俾警三司僚屬各率其職非令諫官不言時務觀乃妄有援引以諷刺朕姑為容忍不欲深責乃令出知道州移廣南西路轉運使坐奏交州黎桓為亂

兵所殺丁濬復位事不實被劾獄未具卒於桂州年五十二觀廣覽漢史雅好論事辭理切直有古人之風焉

論曰保勲從其子以死事宋璫忘其身以恤民臧丙信友誼以明枉其所履歷皆有足觀中正粗振風紀而峻深寡恕袁廓剛徇夸誕以徼寵任承恭平恕知止而好佞佛固皆未盡於善知古首獻征南之謀遂階試用而其攬轡舊都猶尋宿怨與昔人所謂不以私怨惡廢鄉黨之好者異矣郭載肆為矯誣而懷恚以死休復虧慎終之孝而樂致人於禍庸何議焉若

觀之獻納忠讜識達體要則又可嘉者也

陳從信字思齊亳州永城人恭謹強心計精敏太宗在晉邸令典財用王宮事無大小悉委焉累官右知客押衙開寶三年秋三司言倉儲月給止及明年二月請分屯諸軍盡率民船以資江淮漕運太祖大怒責之曰國無九年之蓄曰不足爾不素計而使倉儲垂盡乃請屯兵括民船以運是可卒致乎今設汝安用苟有所闕當罪汝以謝衆三司使楚昭輔懼詣太宗求寬釋使得盡力太宗既許召從信問之對曰從信嘗遊楚泗知糧運之患良以舟人之食日歷郡縣

勘給是以凝滯若自發舟計日往復併支可以責其程限又楚泗運米千舟至京復輦入倉宜宿備運卒令即時出納如此每運可減數十日楚泗至京千里舊八十日一運一歲三運若去淹留之虛日則歲可增一運焉今三司欲籍民舟若不許則無以責辨許之則冬中京師薪炭殆絕矣不若募舟之堅者漕糧其損敗者任載薪炭則公私俱濟今市米騰貴官價斗錢七十賈者失利無敢致於京師雖居商厚儲亦匿而不糶是以米益貴民將餓殍若聽民自便即四方奔湊米多而價自賤矣太宗明日具奏太祖可之

其事果集焉太宗即位遷東上閣門使充樞密都承
旨會八作副使綦廷珪因疾假滿不落籍一日不朝
參即入班中宣徽使潘美王仁贍並坐奪奉一季從
信與閣門使商鳳責授閑廐使閣門祗候餘抵罪有
差太平興國三年改左衛將軍復爲樞密都承旨太
宗征并汾以爲太內副部署七年坐秦王廷美事以
本官罷明年分使三部以從信爲度支使賜第于浚
儀寶積坊加右衛大將軍九年卒年七十三贈太尉
從信好方術有李八百者自言八百歲從信事之甚
謹冀傳其術竟無所得又侯莫陳利用者所爲多不

法始因從信推薦人以是少之

張平青州臨朐人弱冠寓單州依刺史羅金山金山
移滁州署平馬步都虞候太宗尹京兆置其邸及秦
王廷美領貴州復署爲親吏後數年有譖平匿府中
錢物秦王曰太宗鞫之無狀秦王益不喜遂遣去太
宗憐其非罪以屬徐帥高繼冲繼冲署爲鎮將平歎
曰吾命雖蹇後未必不爲福也太宗卽位召補右班
殿直監市木秦隴平悉更新制建都務計水陸之費
以春秋二時聯巨筏自渭達河歷砥柱以集于京期
歲之間良材山積太宗嘉其功遷供奉官監陽平都

木務兼造船塲舊官造舟既成以河流湍悍備其漂
失凡一舟調三戶守之歲役戶數千平遂穿池引水
繫舟其中不復調民有寇陽拔華者往來關輔間爲
患積年朝廷命內侍督數州兵討之不克平以好辭
遣人說之遂來歸改崇儀副使仍領其務凡九年計
省官錢八十萬緡雍熙初召還同知三班事遷如京
使三年改西上閣門使纔三月又改客省使四年代
王明爲鹽鐵使平掌陽平署積年是秋聞陝西轉運
使李安發其舊爲陽平姦利憂恚成疾而卒年六十
三廢朝贈右千牛衛上將軍官給葬具平好史傳微

時遇異書盡日耽玩或解衣易之及貴聚書數千卷
在彭門日郡吏有侮平者數輩後悉被罪配京窯務
平子從式適董其役見之以語平平召至第爲設酒
饌勞之曰公等不幸偶罹斯患慎勿以前爲念給以
緡錢且戒從式善視之未幾遇赦得原時人稱其寬
厚從式事太宗藩邸累官文思使次子從吉以蔭補
殿直轉供奉官知宜州屢破溪蠻轉運使堯叟上其
狀累遷內殿崇班閣門祗候在任凡八年代還爲如
京副使咸平中知環州嘗與宋沆率兵襲西夏小衄
部署張凝表其專責授內殿宗班俄知澧州復舊秩

宋史列傳卷三十五 三十一
景德四年宜州軍校陳進叛命副曹利用爲廣南東西路安撫使將兵討之次象州大鳥砦與賊戰進爲先鋒郭志言所刺遂入城斬首六十級以平賊功改莊宅副使未還卒年四十九

王繼升冀州阜城人性純質謹愿事太宗於藩邸太宗信任之卽位補供奉官累遷軍器庫副使陳洪進來獻漳泉之地以繼升爲泉州兵馬都監會游洋洞民萬餘叛攻泉繼升潛率精騎二百夜擊破之擒其魁械送闕下餘黨悉平召還遷軍器庫使領順州刺史知諸道陸路發運事雍熙四年以諸道水陸發運

併爲一司命繼升與刑部員外郎董儼同掌其事號爲稱職俄遷右神武軍將軍端拱初改領本州團練使三月卒年六十四太宗頗嗟悼贈洋州觀察使葬事官給子昭遠

昭遠形質魁偉色黑繼升名之鐵山有膂力善騎射少時入山捕鷹鷂值澗水暴漲十餘丈昭遠升大樹經宿得免嘗涉河冰陷二公傍共援出之昭遠神色自若喜與里中惡少遊處一日衆祀里神昭遠適至有以博投授之謂曰汝他日儻有節鉞試擲以卜之昭遠一擲六齒皆赤南遊京師事太宗於晉邸特被

親遇常呼其小字及即位補殿前指揮使稍遷都知
從征太原先登爲流矢所中血漬甲縷戰益急會劉
繼元降命守城門籍兵仗又從征范陽多所擒獲超
散員指揮使涪土之遷房陵也禁衛諸校楊均王榮
等以依附被譴獨昭遠無所預太宗以爲忠再遷東
四班都虞候轉殿前班都指揮使領寰州刺史改馬
步軍都軍頭命乘轉鎮定高陽關募兵以備契丹又
爲冀州駐泊都監俄授澤州團練使洛州都部署太
宗屢稱其能可備急使端拱初召爲殿前都虞候領
勤州防禦使命有司治綾錦院爲公署掘地得 鐵

若山形或言此地即鐵山故營又與昭遠幼名合聞
者異之太宗嘗草書紈扇作古詩賜諸將意多比諷
其賜昭遠尤加賞遇二年領沙州觀察使再爲并代
副都部署至道中李繼遷擾西鄙絕靈武糧道命昭
遠爲靈州路都部署護二十五州芻粟竟達靈武繼
遷不敢犯真宗即位徙定州行營都部署未幾拜保
靜軍節度使充天雄軍都部署知府事咸平二年移
知河陽數月卒年五十六時車駕在大名爲廢朝贈
太尉謚惠和中使護葬昭遠頗知書性吝嗇所至無
善政毋弟昭懿亦事晉邸至捧日都虞候弟昭遜西

京作坊使初祖母郭氏嘗對昭遠母指昭遠曰此兒有貴相他日必至公侯指昭懿曰此兒奉錢過二萬不能勝矣果皆如其言昭遠子懷普九歲事太宗左右至西京左藏庫使平州刺史懷一供備庫副使懷正內殿承制懷英內殿崇班

尹憲并州晉陽人開寶中事太宗於藩邸太宗即位擢爲殿直充延州保安軍使改供奉官太平興國四年護府州屯兵與鄜州三族會攻嵐州破敵千餘衆擒僞知嵐州事馬延忠拔緣河諸砦以功轉西京作坊副使入朔州界破寧武軍殺其軍使獲人馬器甲

甚衆改護夏州兵轉供備庫使殺戮三汭醜奴莊宓伽羅臚葉十四族及誘其渠帥屢降詔書褒美雍熙初詔就知夏州攻破李繼遷之衆于地斤澤繼遷遁走俘獲四百餘帳奏請於所部抽移諸帳別置騎兵號曰平砦以備其用詔從之俄殺蘆關及南山野狸數族諸族遂擾代還爲洪州巡檢未幾命護莫州屯兵三年詔知瀛州兼兵馬鈐轄領富州刺史遷東上閣門使端拱二年知滄州移邢州皆兼鈐轄淳化初與王文寶並命爲四方館使連護鎮定州屯兵改知具州移高陽關兵馬鈐轄五年知定州與兵馬部署

王榮不協榮素粗暴因忿毆憲仆地憲快快致疾數日卒年六十三

王賓許州許田人小心謹愿年十餘事宣祖在右及長善騎射太宗領兗海節劄太祖以署府中右職太平興國初補東頭供奉官亳州監軍賓妻妬悍賓不能制時監軍不許挈家至任所妻檀至毫賓具白上太宗召其妻俾衛士粹之杖百以妻忠靖卒一夕歿遷賓儀鸞副使領內酒坊從征太原又從征范陽與彰信節度劉遇攻城東面五年車駕北巡副王仁瞻爲大內都部署七年改洛苑使會汴漕壅滯軍食不

給詔別置水陸發運兩司以賓有心計會領演州刺史與儒州刺史許昌裔同掌其事凡四年儲積增羨號爲稱職俄改右神武將軍黎陽當舟車交會禁兵常屯萬餘以度支使張遜薦命賓護黎陽軍兼領黃御兩河發運事俄領本州團練使以賓請黎陽建通利軍命就知軍事賓規起公署郵館供帳之器咸具加本軍大將軍歲別給錢二百萬俄兼河北水陸路轉運使貝州兵屯無壁壘分寓邸肆賓選隙地築舍千二百餘以處之優詔褒美召爲右羽林軍大將軍判左金吾兼六軍諸衛儀仗司事淳化四年出知揚

州兼淮南發運使徙爲通許鎮都監至道元年卒年七十三賻贈加等賓事宣祖太祖太宗殆六十年最爲勤舊故恩寵尤異前後賜賚數千萬俱奉釋氏在黎陽日按見古寺基卽以奉錢修之掘地丈餘得數石佛及石碣有賓姓名賓異其事以聞詔名寺爲淳化賜新印經一藏錢三百萬以助之

安忠河南洛陽人祖叔于仕晉累任方鎮以太子太師致仕父延韜左清道率府率忠形質魁岸不知書纔通姓名而已事太宗藩邸殆二十年太宗卽位授東頭供奉官掌弓箭庫遷內弓箭庫副使西京作坊

使掌翰林司內衣庫提點醫官院掌屯兵于雄州會曹彬敗于拒馬河忠分砦兵布列緣邊以備游騎又鑿河葺城壁俄徙威虜軍又隸鎮定路大陣之左相就擢東上閣門使與大將李繼隆田重進崔翰追契丹兵祁州北詔書獎飭端拱元年移護高陽關屯兵契丹侵鎮定又與崔翰拒之傳潛陣于瀛州忠當城之西面二年徙知壽州踰月移貝州有劇賊十二人久爲民患忠捕之悉獲淳化四年判左金吾衛仗王賓出知揚州以忠代爲左龍武軍大將軍忠泣請諸衛將軍列在朝外不得迎左右願復舊職上笑曰環

列之官古官也大將軍三品汝終不知朝廷表著之位因從其請俄復東上閣門使充淮南諸州兵馬鈐轄至道三年以病求歸至泗州卒年六十四天禧元年錄其孫惟慶為殿直

論曰太宗居潛左右必求忠厚彊幹之士及即位脩舊邸之功陳從信張平王繼升尹憲王賓安忠六人者咸備任使又皆畀以兵食之重寄而各振舉其職焉有足稱者矣然平不修舊怨庶幾進於士夫之度從信所進邪佞以術蠱惑上心猶不免於近侍之常態歟

列傳卷第三十五

列傳卷第三十六

宋史二百七十七

開府儀同三司上柱國錄軍國軍事前書右丞相穆瓘領經事都總裁臣脫脫等奉

勅修

張鑑 姚坦 索湘 宋太初

盧之翰 鄭文寶 王子輿 劉綜

卞袞 許驤 裴莊 牛冕 張適附

樂崇吉 袁逢吉 韓國華 何蒙

慎知禮 子從吉

張鑑字德明瀛州團練使藏英之孫父裔以蔭補供奉官鑑本將家幼能嗜學入衛州霖落山肄業凡十

餘年太平興國三年擢進士第釋褐大理評事監察
州柴墟權務升朝爲太子右贊善大夫知婺州就遷
著作郎還拜監察御史奉詔決獄江左頗雪寃滯歷
殿中侍御史會命曹彬等進討幽州問群臣以方略
鑑上疏極言不可論者以鑑燕人沮議非忠也太宗
置不問與趙延進同掌左藏延進恃恩踰規鑑廷奏
之有旨罷延進以鑑判三司度支憑由催欠司時三
部各置憑由催欠鑑請併爲一從之王明李惟清薦
其能用爲江南轉運使本部有大姓爲民患者鑑以
名聞太宗盡令部送魁首及妻子赴闕以三班職名

羈縻之江左震肅又建議割瑞州清江吉州新淦袁
州新喻三縣置臨江軍時以爲便召還特被慰獎梓
州符昭愿驕僭不法即以鑑代之遷刑部員外郎判
大理寺遷屯田郎中判三司都催欠司改都勾院擢
拜樞密直學士知通進銀臺封駁司又掌三班上言
供奉官以下不考校殿最恐無沮勸即詔鑑兼磨勘
職改三司爲左右計分天下爲十道鑑奏其非便未
幾果復舊淳化中盜起西蜀王繼恩討平之而御軍
無政其下恃功暴橫益州張詠密奏請命近臣分屯
師旅即遣鑑與西京作坊使馮守規偕往召對後苑

門面授方略鑑曰益部新復軍旅不和若聞使命驟至易其戎伍慮或猜懼變生不測請假臣安撫之名太宗稱善鑑至蜀繼恩猶偃蹇不意朝廷聞其縱肆鑑之行付以空名宣頭及廷臣數人鑑與詠即遣部戍卒出境繼恩麾下使臣亦多遣東還督繼恩輩分路討捕殘寇而鑑等招輯反側事平歸朝未至拜左諫議大夫戶部使會五路進兵討西夏令鑑乘傳往環州與李繼隆議護送芻糧入靈州及還上疏曰關輔之民數年以來併有科役畜產蕩盡室廬頓空加以浦洛之行曾經剽劫原州之役又至遷延非獨令

之弗從實緣力所不逮況復先棄糧草見今逐處追科本戶稅租互遣他州送納往返千里費耗十倍愁苦怨嘆充塞路岐自春徂冬曾無暫息餼糧乏絕力用殫窮顧此疲羸尤堪軫恤今若復有差率益致流亡縱令驅迫必恐撓潰願陛下特垂詔旨無使重勞因茲首春俾務東作况靈州一方僻居絕塞雖西陲之舊地實中夏之蠹區竭物力以供湏困甲兵而援送蕭然空壘祇益外虞不若以賜繼遷使懷恩奉籍稍息飛輓之役事當深慮理要預防若待川決而後防火熾而方戢則焚溺之患深矣雖欲拯救其可得

乎尋詔鑑專督軍糧以軍興法從事饋運頗集真宗即位遷給事中使如故咸平初改工部侍郎出知廣州居二年民條其政績上請刻石三年移知朗州溪洞羣蠻數寇擾鑑召酋豪諭以威信皆俯伏聽命初鑑在南海李夷庚爲通判謝德權爲巡檢皆與之不協二人密言鑑以貲付海賈往來貿易故徙小郡至是鑑自陳有親故謫瓊州每以奉米附商舶寄贍之又言夷庚德權儉人貪凶之狀上意稍釋召還以疾徙知相州有芝草生於監牧之室鑑表其祥異以爲河朔弭兵欵附之兆優詔答之景德初卒年五十八

子士廉爲殿中丞士宗太子洗馬士程屯田員外郎姚坦字明白曹州濟陰人開寶中以尚書擢第調補將陵尉歷隰州推官將作監丞知潯州太平興國三年召還爲著作佐郎通判唐州八年諸王出閣詔給諫以上於朝班中舉年五十以上通經有文行者以備宮僚乃以戶部員外郎王適監察御史趙齊爲衛王府諮議左贊善大夫戴玄爲本府翊善水部員外郎趙令圖爲廣平郡王府諮議國子博士閻象爲本府翊善又以起居舍人楊可法國子博士楊幼英左贊善大夫杜新及坦爲皇子翊善國子博士邢昺爲

諸王府侍講坦仍賜緋魚太宗召王適等謂曰諸子
生長深宮未知世務必資良士贊導使日聞忠孝之
道汝等皆朕所慎簡各宜勉之坦歷殿中丞倉部員
外郎賜金紫遷本曹郎中轉考功仍爲益王府翊善
坦性木強固滯王嘗於邸中爲假山費數百萬旣成
召賓僚樂飲置酒共觀之坦獨俛首王強使視之曰
但見血山耳安得假山王驚問故坦曰在田舍時見
州縣催租捕人父子兄弟送縣鞭笞流血被體此假
山皆民租稅所爲非血山而何是時太宗亦爲假山聞
而毀之王少佚豫坦即醜詆王頗鄙其爲人自是坦每

暴揚其事上嘗戒之曰元傑知書好學亦足爲賢王
矣少不中節亦須婉辭規諷况無大故而詆訐之豈
裨贊之道邪頃之左右乃教王詐稱疾不朝太宗曰
使視疾逾月不瘳甚憂之召王乳母問狀乳母曰王
本無疾徒以姚坦檢束居常不得自便王不樂故成
疾上怒曰吾選端士輔王爲善王不能用其諫而又
詐疾欲使朕去正人以自便何可得也且王年少必
爾輩爲之謀耳因命倅至後苑杖之數十召坦慰諭
曰卿居王宮能以正爲群小所疾大爲不易卿但如
是勿慮讒間朕必不聽王薨改衛尉少卿判吏部南

曹他日因事得對上以其舊人召升殿與語坦言及故府意短諸王而稱已之敢言坦退上謂侍臣曰坦在宮邸不能以正理誨諭事有微失卽從而揚之此賣直取名耳景德初求補郡俾知鄧州轉運使表其治狀詔嘉獎之太中祥符初復知光州二年卒年七十五

索湘字巨川滄州鹽山人開寶六年進士釋褐鄆州司理叅軍齊州有大獄連逮者千五百人有司不能決湘受詔授鞫事隨以白太平興國四年轉運使和峴薦其能遷太僕寺丞充度支巡官改太子右贊善

大夫轉殿中丞充推官拜監察御史九年河決壞民田命與戶部推官元玘同按行會詔下東封與劉璠同知泰山路轉運事又爲河北轉運副使湘經度供餽以能幹聞事集加屯田員外郎明年契丹入寇王師劬於君子館敵兵乘勝據中渡橋塞上門將趨鎮州諸將計議未定湘爲田重進書謀結大陣車行聲言會高陽關兵敵以爲然卽擁衆邀我于平虜城夜二鼓率兵而南徑入鎮陽據唐河乘其無備破砦柵及敵兵覺悉遁走雍熙中召爲鹽鐵判官改駕部員外郎端拱二年河北治方田命副樊知舌爲招置營

田使會議罷復爲河北轉運使轉虞部謂中運爲將作少監居無何有訟其擅易庫縑以自用者坐授膳部員外郎知相州時有群盜聚西山下謀斷澶州河橋入攻磁相州援旗伐鼓白晝抄劫鄰郡發兵千人捕逐無敢近湘擇州軍得精銳三百人偵其入境卽掩擊而盡擒之轉運使王嗣宗出狀聞詔復舊官命爲河東轉運使湘以忻州推官石宗道憲州錄事胡則爲幹職命以自隨所至州郡勾檢其簿領焉二人後皆歷清要明年王超等率師趨烏白池抵無定河水源涸絕軍士渴乏時湘已輦大鍬千枝至令鑿井

衆賴以濟真宗卽位入爲右諫議大夫復充河北轉運使屬郡民有幹釀歲輸課甚微而不逞輩因之爲姦盜湘奏廢之德州舊賦民馬以給驛又役民爲步遞湘代以官馬兵卒人皆便之會內殿崇班閻自新建議請於靜戎威虜兩軍置場鬻茶收其利以資軍用湘言非便遂止又言事者請許權場商旅以茶藥等物販易於北界北界商旅許於雄霸州市易資其懋遷庶息邊患詔湘詳議以聞乃上言曰北邊自興置權場商旅輻湊制置深得其宜今若許其交相販易則沿邊商人深入戎界竊爲非便又北界商人若

至雄霸其中或雜姦偽何由辨明况邊民易動難安
蕃戎之情宜爲羈制望且仍舊爲便會有詔規度復
修定州新樂蒲陰兩縣湘以其地迫窄非屯兵之所
遂奏罷之湘少文而長於吏事歷邊郡所至必廣儲
畜爲備豫計出入軍旅間頗著能名先是邊州置權
揚與蕃夷互市而自京輦物貨以充之其中茶茗最
爲煩擾復道遠多損敗湘建議請許商賈緣江載茶
詣邊郡入中旣免道途之耗復有征筭之益又威虜
靜戎軍歲燒緣邊草地以虞南牧言事者又請於比
砦山麓中興置銀冶湘以爲召寇亦奏罷之咸平二

年入爲戶部使受詔詳定三司編敕坐與王扶交相
請托擅易板籍責授將作少監三年出知許州徙荆
南復爲右諫議大夫知廣州四年卒詔遣其子希顏
護喪傳置歸鄉里

宋太初字永初澤州晉城人太平興國三年舉進士
解褐大理評事通判戎州以善政聞有詔褒美遷將
作監丞贊善大夫通判晉州轉太常丞雍熙三年通
判咸都府賜緋魚會詔求直言著守成箴以獻淳化
初遷監察御史時北面用兵選爲雄州通判入判度
支勾院二年爲京西轉運副使未幾移河東四年遷

正使改殿中御史至道初遷兵部員外郎充鹽鐵副使賜金紫時陳恕爲使太初有所規畫必咨恕未嘗自用爲功恕甚德之會西鄙有警轉饋艱急改刑部郎中充陝西轉運使二年命白守榮馬紹忠護芻糧分三番抵靈州轉運副使盧之翰違旨併往爲戎人所剽上怒捕太初及副使秘書丞竇玘繫獄太初責懷州團練副使之翰玘悉除名之翰貶許州司馬玘商州司戶掾明年起太初爲祠部郎中知梓州俄復舊秩真宗嗣位召還復命經度陝西餽運事咸平初拜右諫議大夫知江陵府蠻寇擾動太初以便宜制

遏詔獎之二年再知梓州明年益州雷有終以母老求還詔太初就代時分川陝爲四路各置轉運使上以事有緩急難於均濟命太初爲四路都轉運使要切之務俾同規畫太初與鈐轄楊懷忠頗不協時蜀土始安上慮其臨事矛盾亟召太初還會御史中丞趙昌言等坐事被劾命權御史中丞先是按劾有罪必豫請朝旨太初以爲失風憲體獄成然後聞上時論躉之俄出知杭州太初有宿疾以浙右卑濕不便求近地得廬州疾久頗昏忘不能治大郡連徙汝光二州景德四年卒年六十二錄其弟繼讓試校書郎

太初性周慎所至有幹職譽嘗著簡譚三十八篇自序略曰廣平生纂文史者釋之學嘗謂禮之中庸伯陽之自然釋氏之無爲其歸一也喜以古聖道契當世之事而患未博也忽外物觸於耳目內譏發於性情因筆而簡之以備闕忘耳子傳慶後爲太子中舍盧之翰字維周祁州人曾祖玄暉鴻臚卿祖知誨天雄軍掌書記父宪蔡州防禦判官之翰少篤學家貧客遊單州防禦使劉乙館於門下乙徙錢塘之翰隨寓其郡太平興國四年舉進士不得解詣登聞自陳詔聽附京兆府解試明年登第解褐大理評事知臨

安縣三遷殿中丞通判洛州會契丹入寇之翰募城中丁壯決漳御河以固城壁虜不能攻吏民詣闕求借留召還遷太常博士爲河東轉運副使徙京西轉運副使改工部員外郎建議導淇河合于淮達許州以便漕運以勞加戶部員外郎又改陝西轉運使遷吏部員外郎至道初李順亂蜀命兼西川安撫轉運使賊平還任之翰嘗薦李憲爲大理丞憲坐賊抵死之翰當削三任時副使鄭文寶議城清遠軍又禁蕃商貨鹽之翰心知其非便以文寶方任事不敢異其議及文寶得罪之翰併前愆左授國子博士領使如

故尋復舊職會調發芻糧輸靈州詔分三道護送命
洛苑使白守榮馬紹忠領其事之翰達旨擅併爲一
爲李繼遷邀擊于浦洛河大失輜重詔國子博士王
用和乘傳逮捕繫獄鞫問之翰坐除名貶詐州司馬
明年起爲工部員外郎同勾當陝西轉運使真宗即
位復吏部員外郎充轉運使以久次召拜禮部郎中
賜金紫復遣之任咸平元年以疾命國子博士張志
言代還未幾復出爲京西轉運使先是朝廷議城故
原州以張守備之翰沮罷之其後西鄙不寧修葺爲
鎮戎軍之翰坐橫議非便黜知歸州便道之官限五

日即發二年授廣南西路轉運使會廣州索湘卒就
改太常少卿知州事之翰無廉稱又與轉運使凌策
不協陰發其事五年徙知永州未行卒年五十七

鄭文寶字仲賢右千牛衛大將軍彥華之子彥華初
事李煜文寶以蔭授奉禮郎掌煜子清源公仲寓書
籍遷校書郎入宋煜以環衛奉朝請文寶欲一見慮
衛者難之乃被篋荷笠以漁者見陳聖主寬宥之意
宜謹節奉上勿爲他慮煜忠之後補廣文館生深爲
李昉所知太平興國八年登進士第除脩武主簿遷
大理評事知梓州錄事參軍事州將表薦轉光祿寺

丞留一歲代歸獻所著文召試翰林改著作佐郎通判潁州丁外艱起知州事召拜殿中丞使川陝均稅次渝涪聞夔州廣武卒謀亂乃乘舸泛江一夕數百里以計平之授陝西轉運副使許便宜從事會歲歉誘豪民出粟二萬斛活飢民八萬六千口旣而李順亂西蜀秦隴賊趙包聚徒數千將趨劍閣以附之文寶移書蜀郡分兵討襲獲其渠魁餘黨殲焉文寶前後自環慶部糧越旱海入靈武者十二次曉達蕃情習其語經由部落每宿酋長帳中其人或呼爲父遷太常博士內侍方保吉出使陝右頗恣橫且言文寶

與陳堯叟交游爲薦其弟堯佐驛召令辨對途中上書自明太宗察其事坐保吉罪厚賜文寶而遣之俄又召至闕下文寶奏對捷辨上深眷遇俄加工部員外郎時龍猛卒戍環慶七年不得代思歸謀亂文寶矯詔以庫金給將士且自劾請代償詔蠲其所費先是諸羌部落樹藝殊少但用池鹽與邊民交易穀麥會魏輓趨靈州爲繼遷所鈔文寶建議以爲銀夏之北千里不毛但以販青白鹽爲命爾請禁之許商人販安邑解縣兩池鹽於陝西以濟民食官獲其利而戎益困繼遷可不戰而屈乃詔自陝以西有敢私市

者皆抵死募告者差定其罪行之數月犯者益衆戎人乏食相率寇邊屠小康堡內屬萬餘帳亦叛商人販兩池鹽少利多取他逕出唐鄧襄汝間邀善價吏不能禁關隴民無鹽以食境上騷擾上知其事遣知制誥錢若水馳傳視之悉除其禁召諸族撫諭之乃定朝廷議城古威州遣內侍馮從順訪于文寶文寶言威州在清遠軍西北八十里樂山之西唐大中時靈武朱叔明收長樂州鄯寧張君緒收六關即其地也故壘未圯水甘土沃有良木薪桔之利約葫盧臨洮二河壓明沙蕭關兩戍東控吾原北固峽口足以

襟帶西涼咽喉靈武城之便然環州至伯魚伯魚抵青岡青岡拒清遠皆兩舍而清遠當群山之口扼塞門之要芻車野宿行旅頓絕威州隔城東偶堅石盤互不可浚池地中舊乏井脉又飛鳥泉去城尚千餘步一旦緣邊警急賊引平夏勝兵三千據清遠之衝乘高守險數百人守環州甜水谷獨家原傳箭野狸十族脇從山中熟戶党項孰敢不從又分千騎守磧北清遠軍之口即自環至靈七百里之地非國家所有豈威州可禦哉請先建伯魚青岡清遠三城為頓師歸重之地古人有言金城湯池非粟不能守俟二

年間秦民息肩臣請建營田積粟實邊之策修五原故城專三池鹽利以金帛啖党項酋豪子弟使爲朝廷用不惟安朔方制豎子至於經營安西綏復河湟此其漸也詔從其議文寶至賀蘭山下見唐室營田舊制建議興復可得秔稻萬餘斛減歲運之費清遠據積石嶺在旱海中去靈環皆三四百里素無水泉文寶發民負水數百里外留屯數千人又募民以榆槐雜樹及獠狗鴉鳥至者厚給其直地易鹵樹皆立枯西民甚苦其役而城之不能守卒爲山水所壞又令寧慶州爲水磴亦爲山水漂去繼遷酋長有鬼囉

嵬悉俄者文寶以金帛誘之與手書要約留其長子爲質令陰圖繼遷即遣去謂之曰事成朝廷授汝以刺史文寶又預漆木爲函以備馳獻繼遷之首又發民曳古碑石詣清遠軍將圖紀功而嵬囉等盡以事告繼遷繼遷上表請罪上怒文寶猶含容之旣而文寶復請禁鹽邊民冒法抵罪者甚衆太常博士席羲叟決獄陝西廉知其事以語中丞李昌齡昌齡以聞文寶又奏減解州鹽價未滿歲虧課二十萬貫復爲三司所發乃命鹽鐵副使宋太初爲都轉運使代文寶還下御史臺鞠問具伏下詔切責貶藍山令未幾

移枝江令真宗即位徙京山咸平中召還授殿中丞
掌京南權貨時慶州發兵護芻糧詣靈州文寶素知
山川險易上言必爲繼遷所敗未幾果如其奏轉運
使陳緯沒於賊繼遷進陷清遠軍時文寶丁內艱服
未闋即命相府召詢其策畧文寶因獻河西隴右圖
叙其地利本末且言靈州可棄時方遣大將王超援
靈武即復文寶工部員外郎爲隨軍轉運使至環州
或言靈州已陷文寶乃易其服引單騎冒大雪間道
抵清遠故城盡得其實遂奏班師就除本路轉運使
上疏請再葺清遠軍都部署王漢忠言其好生事遂

徙河東轉運使嘗上言管內廣銳兵萬餘難得資糧
請徙置近南諸州又欲令強壯戶市馬備征役宰相
李沆等以爲廣銳州兵皆本州守城置營必慮安土
重遷徙之卽致紛擾又強壯散處鄉落無所拘轄勒
其市馬亦恐非便上復令文寶條對文寶固執前議
且言土人久留恐或生事上曰前令團併軍伍改置
營壁欲其互移本貫行之已久而文寶確陳其利因
命錢若水詳度以聞若水所對與沆等同遂罷之先
是麟府屯重兵皆河東輸餽雖地里甚邇而限河津
之阻土人利於河東民罕至則芻粟增價上嘗訪使

邊者言河裁闊數十步乃詔文寶於府州定羗軍經
度置浮橋人以爲便會繼遷圍麟州令乘傳晨夜赴
之圍解遷刑部員外郎賜金紫頃之寇準薦其熟西
事可備驅策因復任陝西轉運使嘗出手劄密戒令
邊事與僚屬計議勿得過有須索重擾于下後有言
其張皇者詔從京西以朱台符代之景德元年冬契
丹犯邊又徙河東文寶安輯所部募鄉兵張邊備又
領蕃漢兵赴河北手詔褒諭未幾復涖京西契丹請
和文寶陳經久之策上嘉之三年召還未至遇疾表
求藩郡散秩詔聽不除其籍續奉養疾以其子鄆州

推官於陵爲大理寺丞知襄城縣以便其養大中祥
符初改兵部員外郎車駕祠汾陰還文寶至鄭州請
見上以其久疾除忠武軍行軍司馬文寶不就以前
官歸襄城別墅六年卒年六十一文寶好談方畧以
功名爲己任久在西邊參預兵計心有餘而識不足
又不護細行所延薦屬吏至多而未嘗擇也晚年病
廢從子爲邑多撓縣政能爲詩善篆書工鼓琴有集
二十卷又撰談苑二十卷江表志三卷

王子輿字希孟密州莒人曾祖甲以義勇爲鄉人所
推唐末淄青徐兗皆南結吳人以拒梁梁得三鎮吳

人北侵益急沂密尤被其害州民聚為八砦以扞寇
遂署甲為八砦都指揮使祖徽襲父職晉末賊帥趙
重進掠高密徽戰沒父璉復嗣其事周世宗平淮陽
始去兵即農厚自封殖子與少業文辭太平興國八
年舉進士解褐北海主簿歷大理評事知臨海縣改
光祿寺丞使西蜀決獄還知興國軍淳化中雷有終
為江浙荆湖茶鹽制置使奏子與為判官轉太子中
允改著作郎江淮兩浙制置茶鹽就轉太常博士真
宗即位遷殿中侍御史因入對與三司論列利害以
子與為長轉度支員外郎子與以每事上計司移報

稽滯求兼省職乃命為鹽鐵判官仍領制置增歲課
五十餘萬貫咸平三年就命兼充淮南轉運使子與
精於吏事久掌茶鹽漕運周知利害裁量經制公私
使之所至郡縣以公事申請者文牒紛委頃刻待報
子與皆即決遣曾無疑滯明年表求代詔許自擇子
與以卞袞劉師道名聞即命袞與師道為轉運使名
子與拜右諫議大夫戶部使五年二月方奏事便殿
俄疾作仆地命中使掖之以出至第卒以子道宗方
幼命三司判官朱台符檢校其家子與止一子而三
女皆幼道宗尋卒家寓楚州子與妻劉還父母家子

輿旅襯在京師景德中官借船移柩還葬其里鬻京師居第以錢寄楚州官庫以備三女資送從其從弟之請也

劉綜字居正河中虞鄉人少依外兄通遠軍使董遵誨遵誨嘗遣貢馬太祖嘉其敏辨將授三班之職綜自陳素習詞業願應科舉及還上解真珠盤龍衣令賜遵誨綜辭曰遵誨人臣安敢當此賜上曰吾委遵誨以方面不以此爲疑也雍熙二年舉進士第解褐邛州軍事推官就改永康軍判官遷大理評事通判眉州轉太僕寺丞代還對便殿因言蜀地富庶安寧

已久益州長吏望慎擇其人上嘉之改太子中允未幾李順果爲亂復召見面賜緋魚尋爲三門發運司參陸轉運使通判大名府連丁家難起知建安軍先是天長軍及揚州六合縣民輸賦非便綜奏請降天長軍爲縣隸揚州以六合縣隸建安軍自是民力均濟時淮南轉運使王嗣宗兼發運使規畫多迂滯綜因上言請復置都大發運司專幹其職至道二年遷太常丞職事修舉多稱薦之者咸平初命代王欽若判三司都理欠憑由司出爲河北轉運副使當言州縣幕職官以昏耄放罷者其間有實廉謹之士或幼

累無託或居止無定全藉祿廩以濟朝夕一旦停罷則飢寒無依以傷和氣望自今並除致仕官又言法官斷獄皆引律令之文以定輕重之罪及其奏御復云慮未得中別取進止殊非一成不變之道且復煩於聖斷望自今降旨約束不得復然時河北承兵寇之後民戶凋弊吏部所銓幕職州縣官皆四方之人不習風俗且有懷土之思以是政事多因循不舉綜建議請自今並以河朔人充之冀其安居勤於職事夏人擾西邊環慶大屯士馬詔徙綜為陝西轉運副使轉太常博士時梁鼎議禁解鹽官自貨鬻乃命綜

與杜承脣制置青白鹽事綜條上利害力言非便卒罷其事時靈州孤危獻言者或請棄之綜上言曰國家財力雄富士卒精銳而未能剪除凶孽者誠以賞罰未行而所任非其材故也今或輕從群議欲棄靈州是中賊之姦計矣且靈州民淳土沃為西陲巨屏所宜固守以為扞敵然後於浦洛河建軍城屯兵積糧為之應援此暫勞永佚之勢也况鎮戎軍與靈州相接今若棄之則原渭等州益湏設備較其勞費十倍而多則利害之理昭然可驗矣俄充轉運使四年又獻議於鎮戎軍置屯田務又錄唐安國鎮制置城

壕鎮戎古記石本以進詔從其請俄詣闕奏事稱旨
賜金紫緡錢五十萬復遣涖職又嘗言天下州郡長
吏審官皆據資例而受未為得人自今西川荆湖江
浙福建廣南知州或地居津要或戶口繁庶之處望
親加選任其執政舊臣及給舍以上知州處亦擇官
通判又京朝官當任遠官者率以父母未葬為辭意
求規免請自今父母委未葬者許請告營辦審官長
狀並明言父母已葬方許依例考課違者並罷其官
從之五年拜工部員外郎兼侍御史知雜事六年遷
起居舍人再為河北轉運使時兩河用兵邊事煩急

轉漕之任尤所倚辦綜繼領其職號為詳練至是眷
矚甚厚警急之際輒資其奏處契丹請和乃遣近臣
諭以擢用之意景德二年召拜戶部員外郎樞密直
學士勾當三班院綜言御史員數至少每奉朝請劾
制獄多以他官承之甚紊彙制望詔兩制以上各舉
才堪御史者克三院共署十員若出使按獄所經州
郡官吏能否生民利病刑獄枉濫悉得察舉四年西
幸道出河陽境上時節度王顯被疾還京以綜權知
孟州事未幾召還復出知并州以政績聞州民乞留
優詔嘉獎歸朝知審官院改吏禮二部郎中竟職兼

知通進銀臺封駁司大中祥符四年館伴契丹使因
作大雪歌以獻即命同知貢舉以李宗諤代爲館伴
使俄權知開封府綜以貴要交結富民爲之請求或
託爲親屬奏授試秩緣此謁見官司頗紊公政因建
議請加抑止又文武官居遠任而家屬寓京師其子
孫弟姪無賴者望嚴行約束并其交游輩劾罪從之
七年以老疾求典河中真宗以太寧宮廟長吏奉祠
綜艱於拜起慮不克恭事命知廬州明年罷學士授
右諫議大夫八年卒年六十一綜強敏有吏材所至
抑挫豪右振舉文法時稱幹治然尚氣好勝不爲物

論所許子建中正中並贊善大夫弟綽淳化三年進
士官刑部郎中

卞衮字垂象益州成都人父震工爲詩舉蜀進士渝
州刺史南光海辟爲判官蜀平仍舊職會賊杜承褒
率衆圍城援兵不至震躬率士卒且戰且拒爲流矢
所中創甚不能臨軍而州兵重傷卷甲宵遁刺史陳
文襲不能遏賊遂入據郡城以僞官厚賄誘震震皆
斬其使賊有東章者本州兵校也因遣人述朝廷威
德諭以禍福章懼且信因伏兵擊其黨類承褒之衆
素不爲備即時大潰震與文襲分部餘卒夾攻之賊

衆遂平文襲坐陷失州城削籍為民震以前功得贖以虢州錄事參軍卒太平興國八年衮登進士第累遷大理評事知將樂縣改光祿寺丞通判泗州遷著作佐郎廣南轉運司承受公事俄通判宣州淳化中上命采庶僚中廉幹者給御書印紙俾書課最仍賜實奉以旌異之衮預焉改太常丞咸平初遷監察御史為淮南轉運副使同荆湖發運使以幹職聞就加殿中侍御史入判三司開拆司再為淮南轉運使兼發運使咸平六年併三司使之職而分置副貳以衮為刑部員外郎充鹽鐵副使景德初疽發於背卒年

四十五錄其弟辰為臨穎主簿于咸為將作監主簿衮明敏有吏幹累掌財賦清心治局號為稱職然性慘毒措克嚴峻專事捶楚至有大蟲之號真宗嘗謂近臣曰衮公忠盡瘁無所畏避人罕能及然頃在外任頗傷殘酷所至州縣纖微之過無所容貸大凡督察部下糾逖愆違非有大故所宜矜恕官吏自當畏威懷惠不敢貳過公家之事亦無不濟乃知為吏之方適中為善也

許驤字允升世家薊州祖信父唐世以財雄邊郡後唐之季唐知契丹將擾邊白其父曰今國政廢弛狄

人心乘釁而動則朔易之地民罹其災苟不即去且
爲所虜矣信以資產富殖不樂他徙唐遂潛齎百金
而南未幾晉祖革命果以燕薊賂契丹唐歸路遂絕
嘗擁商貲於汴洛間見進士綴行而出竊嘆曰生子
當令如此因不復行商卜居睢陽娶李氏女生驤風
骨秀異唐曰成吾志矣郡人戚同文以經術聚徒唐
攜驤詣之且曰唐頃者不辭父母死有餘恨今拜先
生即吾父矣又自念不學思教子以興宗緒此子雖
幼願先生成之驤十三能屬文善詞賦唐不識字而
罄家產爲驤交當時秀彥驤太平興國初詣貢部與

呂蒙正齊名太宗尹京頗知之及廷試擢甲科解褐
將作監丞通判益州賜錢二十萬遷右贊善大夫五
年轉右拾遺直史館改右補闕六年出爲陝府西北
路轉運副使會罷副使徙知鄜州召還爲比部員外
郎歷知宣昇二州雍熙二年改江南轉運副使洪吉
上供運船水損物主吏懼罪故覆舟鞠獄者按以欺
盜當流死者數百人驤馳往訊問得其情實以聞多
獲輕典優詔褒之又上言劫盜配流遇赦得原還本
鄉讐告捕者多所殺害自今請以隸軍詔可遷正使
端拱初拜主客郎中俄徙知福州累表求還不俟報

入朝召對便殿延問良久改兵部郎中領西川轉運使以久處外任爲辭擢授右諫議大夫就命知益州召歸上言蜀民浮窳易搖宜擇忠厚者撫之爲預備旣而李順叛衆頗服其先見命知審官院遷御史中丞以疾固讓不許占謝日命坐勞問出良藥賜之曰此朕所服得驗者後驤以久病不能振職真宗即位改工部侍郎屢求小郡養疾因入朝失儀爲御史所糾特詔不問命知單州咸平二年卒年五十七贈工部尚書賜其子宗壽出身驤雖無他才畧而人以儒厚長者稱之宗壽後爲殿中丞

裴莊字端已閬州閬中人曾祖琛後唐昭州刺史祖遠河東觀察支使父全福鄆縣令莊在蜀以明經登第歸宋歷虹縣尉高陵主簿本府召權司理掾轉運使雷德驤以威望自任嘗巡按至境官屬皆出迎候莊獨視事本局徐謁道周德驤稱其有守徙權忻州錄事參軍先是并州侍積軍儲條制甚峻掌出納者嘗十餘人莊代之獨任其事擢授絳州防禦推官提點并嵐二州緡帛芻糧改遼州判官仍泣舊局雍熙三年命將巡邊以莊掌隨軍糧料內客省使楊守一稱薦之授大理寺丞時遷雲朔降戶於汝洛遣莊安

輯之俄通判忻州未上道會魏咸信出鎮澶州改命
通判未踰年咸信表其能遷太子中允端拱初潘美
鎮真定又辟爲通判時契丹掠趙深邊將無功莊上
書以爲周世宗誅樊愛能何徽二將遂取淮南克巴
蜀願陛下申明紀律無使玩寇又言緣邊砦柵戍兵
旣寡戎人易以襲取咸請廢罷以益州兵會詔建方
田莊復上言大役兵師慮生事於邊鄙上善之淳化
三年召訪以邊事稱旨回賜緋魚令授清資官翊日
拜監察御史荆湖南路轉運使未行改三司鹽鐵判
官上疏請給兩省官諫紙又引故事禁屠月勿報重刑

會劉式建議請廢緣江榷務莊力言其非便出爲荆
湖北路轉運使五年李順亂蜀命與雷有終並兼陝
路隨軍轉運同兵馬事或言莊本蜀人不宜任此上
益以信之許以便宜事平轉殿中侍御史歷工部司
封二員外郎特召問討賊方略至道二年遣將五路
出討李繼遷莊陰料師出無功因請加恩繼遷俟其
倔強拒命則按甲塞外俘擒未晚旣而諸將果敗績
俄遷祠部郎中眞宗卽位遷度支充河粟轉運使上
章言慶邠延州通遠軍咸處邊要請武幹如姚内斌
董遵誨者任之又言田紹斌嘗陂疑韓崇業本秦王

婿程德玄始事晉邸初甚親近後踈遠外遷皆懷怨望不宜委以戎寄未幾移知蘇州咸平二年命巡撫江南使還言池州興國軍得良吏餘無足稱者且言朝廷所命知州通判率以資考而授至有因循偷安無政術而繼得親民者其素蘊公器有政績者偶緣公坐則黜司冗務真偽莫辨僥倖滋甚自今望慎選其人勿以資格補授有政績者加以恩禮是年秋契丹犯塞命爲河北轉運使時傅潛統大軍駐定州北莊屢條奏其無謀略慮或失機會王顯掌樞密顯與潛俱起攀附頗庇之莊奏至多不報徙知越州俄傳

潛得罪莊因上言顯潛皆非材致誤邊事請行嚴誅以肅群議未幾徙知宣州會詔百辟上封直言莊條列四事一曰去暴征二曰省煩刑三曰擇吏職四曰敦稼政疏奏詔令開陳其所宜行先後莊對甚悉政司封郎中景德初安撫兩浙奏能吏二十人慢官者五人多所升黜又知潞邢二州大中祥符初東封改鴻臚少卿入判登聞鼓院祀汾陰遷太僕少卿爲北嶽加號冊禮副使撰北行記三卷以獻六年出知襄州明年車駕幸南京莊以逮事太宗恩例授大府卿權判西京留司御史臺天禧二年入判刑部以疾分

司西京郊祀改光祿卿求歸上都以便醫藥卒年八十一錄其孫慶孫試將作監主簿莊有吏幹頗無清操慷慨敢言太宗獎其忠讜多所聽納好爲規畫然寡學術嘗建議請置廣聽院西垣學士聞者嗤之晚年退居製棺槨以自隨喜接賓客終日無倦子真咸平二年進士屯田郎中稷左班殿直閣門祗候牛冕字君儀徐州彭城人太平興國三年進士解褐將作監丞通判郴州徙和州加左贊善大夫遷太常丞知滁州以勤政聞召歸轉監察御史端拱元年召試文章遷左正言直史館出知潤州徙泉州未至就

命爲福建轉運使加左司諫建議廢邵武軍歸化金坑土人使之至道初召入進秩兵部員外郎知潭州至郡才數日復召拜兼侍御史知雜事真宗在東宮冕嘗奉使賜生辰禮幣卽位尚記其名改工部郎中永熙陵復土會闕中丞命爲儀仗使時三司各設官局多不均濟冕請合爲一使分設其貳則事務不煩而辨其後卒用冕議咸平元年選知益州仍拜右諫議大夫兩川自李順平後民罹困苦未安其業朝廷緩於矜恤故戍卒乘苻昭壽之虐嘯集爲亂冕與轉運使張適委城奔漢州詔遣赴闕至京兆劾其罪並

削籍冕流儋州適爲連州參軍冕遇赦移欽英二州
歷鄂海二州別駕淮南節度副使大中祥符初真宗
語宰相曰冕素純善黜棄久矣量宜甄叙卽起知漣
水軍俄復爲祠部員外郎卒年六十四子昭儉至殿
中丞
張適者太平興國五年進士任藩郡有治績以廉敏
稱爲水部員外郎知鄜州獲對太宗喜其詞氣俊邁
賜緋魚旋改京東轉運副使加直集賢院一日三被
寵渥時人榮之徙西川轉運使坐貶後起爲彰信軍
節度副使知淮陽軍卒

樂崇吉字世昌開封封丘人少爲吏部令史上書言
事調補臨淄主簿會令坐賊敗卽命崇吉代之復以
書判優等改舒州團練判官未行留爲中書刑房堂
後官改太子右贊善大夫出掌揚州權務未幾遷殿
中丞復爲堂後官兼提點五房公事崇吉明習文法
清白勤事至道初擢度支員外郎度支副使時以堂
後官著作佐郎楊文質爲秘書丞提點五房事上召
見謂曰汝見擢用樂崇吉否當自勗勵崇吉俄加祠
部郎中真宗時累擢爲江南轉運使代還判刑部兼
鼓司登聞院後遷司農少卿知洪州有司歲歛民財

造舟崇吉至奏罷之以疾徙濠州遷衛尉少卿以將作監致仕卒于二人源虞部員外沂殿中丞

袁逢吉字延之開封鄆陵人曾祖儀仕唐以軍功至黃州刺史祖光甫尉氏令父蟾大理評事逢吉四歲能誦爾雅孝經七歲兼通論語尚書周太祖召見發篇試之賜束帛以賞其精習開寶八年擢三傳第釋褐清江尉知州上明薦其能就除豐城令明年又與轉運使張去華條上治狀以春秋博士召端拱初遷國子博士度支推官又判戶部勾院度支憑由理欠司淳化中改戶部判官歷水部司門員外郎出爲西

京轉運使轉水部郎中宰相呂蒙正薦其有經術宜任學官會蜀叛方藉其吏資授西川轉運使至道初徙荆湖北路時賊方平夔峽猶聚官軍供饋出於荆楚逢吉憚涉遠不赴軍前計度坐之糧餉罷職知夔州會遣使川陝採訪因條上知州通判有治迹者七人逢吉與朱協李虛已薛顏邵曄查道劉檢預焉皆賜詔褒諭歷司門庫部二郎中咸平中復爲京東轉運使連知福江陳襄四州大中祥符中權西京留司御史臺徙知汝州以逮事太祖拜鴻臚少卿七年卒年六十九逢吉性修謹練達時務初鄆州牧馬草地

侵民田數百頃牒訴連上凡五遣使按視不決逢吉受命往則悉還所侵田民咸德之兄及甫歷京東峽路轉運副使至駕部郎中逢吉子成務至比部員外郎京東轉運副使從子楚材至虞部員外郎

韓國華字光弼相州安陽人太平興國二年舉進士解褐大理評事通判瀘州就遷右贊善大夫代還除彰德軍節度判官遷著作佐郎監察御史雍熙中假太常少卿使高麗時太宗將北征以高麗接遼境屢爲其所侵命齎詔諭之且令發兵西會既至其俗頗獷鶩恃險遷延未卽奉詔國華移檄諭以朝廷威德

宜亟守臣節否則天兵東下無以逃責於是俯伏聽命使還賜緋魚雍熙三年改右拾遺直史館判鼓司登聞院俄充三司開拆推官四年判本司遷左司諫充鹽鐵判官淳化二年契丹請和朝議疑其非實遣國華使河朔以察之既至盡得其詐以聞每歲後苑賞花三館學士皆得預三年春國華與潘太初因對自言任兩省清官兼計司職不得侍曲宴願兼館職卽日命並直昭文館後二日陪預就宴三司屬官兼直館自國華等始未幾授刑部員外歷判三司勾院復爲鹽鐵判官又爲左計判官尋都判三司賜金紫

改兵部員外郎屯田郎中京東轉運使徙陝西路舊制川陝官奉緡悉支鐵錢資用多乏國華奏增其數加都官郎中入判大理寺改職方郎中以詳定失中命梁顥代之知河陽潞州轉運使言其善緡輯供億幹辦詔獎之景德中假秘書監使契丹又爲江南巡撫入權開封府判官真宗朝陵魏咸信自曹州召入扈從命國華權州事俄改太常少卿出知泉州大中祥符初遷右諫議大夫四年代還至建州卒于傳舍年五十五賜其子琬出身國華偉儀觀性純直有時譽子琚璵琦並進士及第琦相英宗神宗自有傳

何蒙字叔昭洪州人少精春秋左氏傳李煜時舉進士不第因獻書言事署錄事參軍入宋授洛州推官太平興國五年調遂寧令時太宗親征契丹還作詩以獻召見賞歎授右贊善大夫三遷至水部員外郎通判廬州時郡中火燔廨舍權務俱盡蒙假民器貸鄰郡糶米爲酒旣而課增倍戶部使上其狀詔賚緡錢獎之稍遷司門巡撫使潘慎修薦其材敏驛召至京因面對訪以江淮茶法蒙條奏利害稱旨賜緡魚及錢十萬後二日復對又上淮南酒權便宜特改庫部後賜錢二十萬因命至淮右提總其事自是歲有

美利使還知温州未行留提舉在京諸司庫務求外任復命知温州坐舉人不當削一官真宗卽位復前資因上言請開淮南鹽禁時下袞楊允恭輩方以禁鹽爲便共排抑之出知梧州頃之改水部郎中上所著兵機要類十卷時審官擬知漢陽軍及引對改知鄂州大中祥符初轉庫部四年加太府少卿未幾知太平州又知袁州州民多采金蒙建議請以代租稅上曰若此則農廢業矣不許俄徙濠州六年上表謝事授光祿少卿致仕命未下卒年七十七

慎知禮衢州信安人父溫其有詞學仕錢俶終元帥府判官知禮幼好學年十八獻書于俶署校書郎未幾命爲掌書記宋初介俶子惟濟入覲歸署營田副使太平興國三年從俶歸朝授鴻臚卿歷知陳州興元府知禮母年八十餘居宛丘懇求歸養退處十年緡紳稱其孝及母服除表請納祿至道三年以工部侍郎致仕知禮自幼至白首歲讀五經周而後止每開卷必正衣冠危坐未嘗少懈焉咸平初卒年七十七子從吉

從吉字慶之錢俶之婿也爲元帥府長史歸宋歷將作少監會擇朝士有望者補少列改太子右庶子真

宗升儲換衛尉少卿真宗卽位復爲右庶子遷詹事
從吉自歸朝居散秩幾三十年頗以文酒自娛士大
夫多與之游景德初上言求領事務判刑部頗留意
法律條上便宜天下所奏成案率多糾駁取本司所
積負犯人告身鬻之以市什器大中祥符初改授衛
尉卿糾察在京刑獄拜右諫議大夫判吏部銓初選
人試判多籍地而坐從吉以公錢市筦席給之臨事
敏速勤心公家所至務瞭察多請對陳事上謂其無
隱八年改給事中權知開封府旣受命召戒之曰京
府浩穰凡事太速則誤太緩則滯惟須酌中耳請屬

一無所受才數月有咸平縣民張斌妻盧氏訴侄質
被酒詬悖張素豪族質本養子而証左明白質賄于
吏從吉于大理寺丞銳時督運石塘河往來咸平爲
請于縣宰斷復質劉姓第令與盧同居質泊盧迭爲
訟縣聞於府從吉命戶曹參軍呂楷就縣推問盧之
從叔號畧尉昭一賂白金三百兩於楷楷久不決盧
兄文質又納錢七十萬于從吉長子大理寺丞鈞鈞
以其事白從吉而隱其所受盧又詣府列訴即下其
事右軍巡院昭一兄澄嘗以手書達錢惟演云寄語
從吉事速鈞銳請緩之從吉頗疑懼密請付御史臺

即詔御史王奇直史館梁固鞫之獄成從吉坐削給
事勒停惟演罷翰林學士楷鈞免官配隸衡郢州銳
文質皆削一官澄昭一並決杖配隸又高濂者庫部
郎中士宪之子景德中舉進士宰相寇準以弟之女
妻之寇氏卒故相李沆家復婿之歷官以賄聞頗恃
姻援驕縱被服如公侯家以是欺蠹小民知太康縣
民有詣府訴家產者清納其賄時已罷任即逃居他
所銳嘗就清貸白金七十兩清以多納賄賂事將收
求以爲助時方鞫盧氏獄從吉請對發其事欲以自
解逮清等繫獄命比部員外郎劉宗吉御史江仲甫

劾之清枉法當死特杖脊黥面配沙門島銳又削衛
尉寺丞從吉坐首露在己發當贖銅特削諫議大夫
天禧三年起爲衛尉卿明年判登聞鼓院坐與寇準
善以光祿卿致仕未幾卒年七十從吉喜爲詩時有
警語兼工醫術子孫登仕者甚衆第進士昇朝曳朱
紱者數人家富於財尤能治生多作負販器儲貨以
至鬻棺櫬於市又善爲饌具分遺權要晚年進趨彌
篤以至子敗物論鄙之子鏞金部度支員外郎秘閣
校理楷太常博士

論曰八政之首食貨以國家之經費不可一日而無

也然生之有道而用之有節則存乎其人焉爾張鑑
將命西蜀處制得宜庶乎可與行權者也子輿裁損
經制索湘議罷鬻茶許驥謹守儒行知禮篤信經學
國華不辱君命皆有足稱者焉太初自謂達性命之
蘊而卒流於釋老之歸文寶久任邊郡而不免以生
事蒙絀劉綜著勞朔易而短於經術從吉勤於公務
而踈於訓子固未得爲盡善也自餘諸子之翰虧潔
白之操卞袞乏仁恕之道冕之棄其城守坦之踈於
輔導則君子所不予也

列傳卷第三十六

